

東

華

續

錄

臣朱壽朋敬編

臣潘鴻鼎恭校

秋七月甲午朔日有食之○時享 太廟 上親詣行禮

兩路各州縣被水現

辦大概情形一摺本年六月二十三日永定河漫口大興宛平東安武清永清等縣地方被水災民亟須撫恤業經派家鼐等派員前往查勘辦理急賑仍著速籌款項妥為接濟毋令災民失所所有湖南應解價折銀兩並各省每年應解備荒經費銀兩即著戶部迅速開單咨行各督撫飭令如數解部不得因循拖欠致誤賑濟○諭王文韶奏永定河堤工漫口分別參辦並自請議處一摺本年六月後大雨時行永定河水勢急漲險工迭出二十三日北六工之八號堤頂漫溢二十四日北中汛七號又復漫水聖奎全河大溜口門寬刷數丈餘該管各員疏於防範實屬咎無可辭調署北中汛武清縣縣丞支兆熊著革職留工効力石景山同知張恩遵著革職留任總員下北岸通判蔡廷舉汛員北六工霸州州判陳麗生均著摘去頂戴永定河道陳慶澍河防局道員寶廷馨均著革職留任會辦河防局道員張蓮芬著摘去頂戴王文韶著交部議處該督務當督率在工員弁將漫口速籌堵築並將南岸各汛嚴飭極力防護不得

再有疏虞所有被淹村莊卽著該督迅速查明妥籌撫恤毋令失所○戊戌張汝梅奏陝省清查荒田所有辦理情形業經臣先後具奏在案現查各屬卽委均屬實力奉行略有端倪惟查陝西荒地數十年來疊經整頓卒未能盡闢者其故實有數端請爲我皇上縷晰陳之當初兵災以後繼以大祲百姓流亡殆盡嗣經多方安輯終難復舊此地曠人稀荒地未能盡闢者一也通省土產雜糧居多北山一帶氣候遇差夏寒霜早穡事多不可靠卽平川地面水土稍佳然人少工賁卽使豐收而人少穀賤仍屬得不償失此荒地未能盡闢者又一也農民擇地而耕非有可靠之利孰肯株守因此種荒地墾時工費不支熟後穀價太廉偶遇偏災卽棄而他往故認墾之戶不惟客民多無室家去留無定卽土著亦旋墾旋廢作輟靡常此招墾之難荒地未能盡闢者又一也以上各節均屬實在情形經臣等悉心籌畫更定章程僅能使已墾墾者自首不究既往客民認墾者無侵土民攘奪而已若夫墾闢之難易收穫之豐儉土著之能否力耕無廢客民之能否安此樂郊皆在懸慮莫必之數安能保其不既墾而復荒乎而州縣一經招墾限滿升科卽應歸入額數併計徵不足額則處分甚嚴田無人種則追呼乏術以故各牧令現雖不敢不認真查報而皆惴惴焉以將來之考成爲慮此情實有可原不得不加之體恤臣等再四熟籌欲求地不復荒須使農有餘力必墾戶之土著者足以自存客居者安有家室以後自無棄地而逃之患然此

非旦夕所能覆效伏思催科政拙州縣之責難寬而因時制宜經權所當並用與其拘守例章使懷疑懼未免敬循莫若寬以期限俾得展舒較有實際擬請將自首及新墾各戶分別於首報及墾限屆滿之日起應定升科錢糧予限三年作為另案徵解不入額數考核限內墾戶逃亡熟地復荒免其議處一俟限滿即將升科未荒之地按照例章歸入額數核辦如此則各牧令無所顧慮可以放手辦理必能日起有功而限滿未荒之地升科已歷三年自係確可久種從此額賦永增似覺公私交益下戶部知之○庚子子故直隸按察使朱鼎旬政績交國史館列入循吏傳○諭桂斌等奏掠騙貢使案內訊出要證楚勒圖木供詞請旨辦理一摺此案前據桂斌等參奏當經諭令步軍統領衙門按名嚴傳送交理藩院研訊所有案內之劉達喇嘛依什扎勒參等曾否到案著理藩院查訊具奏楚勒圖木著解京交理藩院研訊○辛丑 上詣 醇賢親王園寓 皇木生妣金棺前行禮○允李鴻藻請子假一月調理以許應駉署禮部尚書○以劄修吉林志告成獎敘出力人員同知郭鈞銘等有差○壬寅 上詣建福宮 孝貞顯皇后聖容前行禮○准安徽巡撫福潤開缺回旗調理○癸卯戶部奏查上年十月間奏撥本年京餉銀七百萬兩嗣因部庫存款無多每月放款甚鉅當於本年三月間撥案添撥銀一百萬兩共銀八百萬兩均限五月前解到一半年底一律解清先後奏准行知各省關遵照在案今查截至本年五月底止除割撥

及已解報解過半並劃撥已解報解起程及半各款外其解不及半暨絲毫未解各省關本應分別參處  
第念本年五月以前放款尙無貽誤仍請照案暫免開參總計本年原撥續撥京餉各省關未解共銀五  
百四十二萬兩分晰繕具清單呈 御覽惟部庫現存正項爲數無多開放時虞不敷各省關若再報  
解遲延實有支應不及之慮相應請 旨飭各該督撫將軍鹽政藩司運司鹽道監督等各將未解京餉  
趕緊陸續提前解部以供開放統於年內拊數解齊倘再諉卸拖欠致誤要請 部定行照章參辦其現  
在解不及半絲毫未解等處經此次奏催後仍不完解卽由 部隨時指名嚴參 上諭戶部奏請旨催  
解京餉一摺本年京餉原撥續撥共銀八百萬兩截至五月底止除劃撥解到及報解起程外尙欠解銀  
五百四十二萬兩現在部庫支絀應放各款均關緊要所有各省關欠解京餉亟應全數報解以應要需  
著該將軍督撫等各將欠解銀兩趕緊陸續提前解部統於年內拊數解齊倘敢諉卸拖欠卽由戶部照  
章參奏其解不及半及絲毫未解等處經此次嚴催後倘仍不完解卽著戶部隨時指名嚴參○孔令貽  
奏准前署兩江總督張之洞咨稱准戶部咨光緒二十年十一月初四日內閣奉 上諭翰林院侍讀  
王懿榮奏請飭整理衍聖公府地產一摺著戶部行咨兩江總督江蘇山東各巡撫按照原奏各節分析  
查清如數撥補等因欽此欽遵查辦去後茲據查明衍聖公府祀田係於元至元三十一年撥有沛縣蔡

家莊六十頃刁陽里三千大畝載在元碑久經湮沒惟既欽奉 特行擬循照元碑所載撥還計一大畝  
卽江省之三畝除同治八年已撥八頃外其餘一百四十二頃以各團上明之地補足歲租每年由衍聖  
公府派人赴徐州道領取業經奏明辦理等因知照前來 當卽恭設香案望 闕叩頭祇謝 天恩訖  
伏念 此項祀田地屬淮南境連泗上黃流改道淪巨浸者百年紅粟登倉闕明湮者累葉昔在同治年  
間曾經撥歸八頃茲復奉 溫詔悉數歸還以徐防有限之餉藉供闕里常徵之需米分溝澮影遊元  
代之區方食稅衣租俾疆臣爲經理凡此 隆施之優渥均非賄竊所敢期 惟有敬謹藏儲誦揚先烈  
釋大保古國之美知聖田明德之馨續史員奉祀之碑頌 聖代 作人之化以期仰答 高厚鴻慈於  
萬一報聞○甲辰以鄧華熙爲安徽巡撫○諭御史宋伯魯奏五城咨送竊案如賊證不符請由刑部仍  
咨該城御史查覆毋庸票傳司坊官赴部面質等語著刑部妥議具奏○宋伯魯奏黃河爲北條巨潰挾  
山陝營豫直東諸水東流入海勢大力猛本易爲患而水行中餘則治之尤難北條經河津千餘里淤蓄  
有所宜洩多途禹跡縱不可尋古意猶可識也南嶽山雲梯關入海路左多山且千餘里中土皆膠黏任  
壘束水以水攻沙尙易爲治若中餘則地勢迫狹土性鬆緩徒以恐壞運道之故不得已而出此然使在  
事各員人人實力奉公未嘗不可爲一勞永逸之計無如始勤終怠百弊叢生各便身圖罔知大局遂使

公帑民命盡赴東流殊可慨也然則中幹遂不可治乎曰可惟有認真而已查近年山東河務幾於無年不報決口甚或一年數報或一報而三四處煩 聖主之焦勞勳司農之策撥撥款議賑年復一年不知帑藏猶易復者也最可憫者百姓耳當夫決口之時水高數十丈壁立而行瞬息千里田園村舍當之者立變澤國浮屍蔽水順流而下或挂樹杪或觸築樓其有幸逢漁舟貨艇他鄉逃救者百無一二田廬漂沒今年之關口無資文契湧然後日之生理亦盡推原其故皆由在工各員不肯實心任事以至於此若不革除積弊將帑儲終無由而節而民命終無由而蘇皇於前歲恭膺 恩命課試山東試竣後留心咨訪頗知一二謹就管見所及敬爲我 皇上陳之一侵蝕官款冒領贖銷宜嚴定處分也河工以人夫土料爲集事之資與軍營中器械糧餉無異一有侵冒夫料不能應手卒至餉事者多矣然未聞有因侵冒指名糾參者足見欺朦相尚積弊已深不知他事侵冒不過貪贖而已至於軍務則勝敗攸關河工乃民生所繫稍有貽誤禍不旋踵近日軍中侵冒之弊屢奉 嚴旨切責申明憲典河工侵冒事同一律擬請有飭下河務省分凡遇此等劣員指名嚴參卽照刑部議覆軍營剋扣侵冒律例一體治罪庶涓滴皆歸工上而公帑與民生交受其益矣一收發正雜各料宜設法稽察也河工委員以收支總局外局料場差使爲最優賈稱榛土差使次之凡差使未派之時重賄營謀巧取藥奪所以然者一經派買土料先

與夫頭料販餉通一氣講明五成報官或六成報官然後購買堆置岸上排架高聳名曰料垛然後稟請收支局委員驗收委員到岸不過一望卽會銜稟報不知料垛皆中空也名爲每垛萬斤或幾千根實不過四五成也而以餘款瓜分入己此等委員每派差一年私囊可有四五千金之多然則工程之堅實與否報銷之虛捏與否俱可想見擬請飭下山東撫臣變通章程設法稽察庶宿弊全除而工程亦當有起色矣一泛溢成口地方宜申明賠修舊例以防隨意改名也查舊例有賠修一條原爲作工委員含糊堵築一經汎漲又復刷開而設乃近來山東通習於泛溢時則謀派承修於到工後則謂水盛無從措手直俟秋涼冬初水落漲消隨意堆堵卽報合龍公款飽乎私囊官階列乎上保迨至來年汎漲豈有不再行衝刷之理及其泛溢成口在工諸員恐賠修之自累於是取舊口鄰近之村名任意更換撫臣亦無從查核率卽照稟入奏在事各員規避之罪尙小其舊年作工之混冒致令顛沛之民復遭昏墊此罪豈容誅乎現在在工各員既有上游中游下游之別各有專責擬請飭部詳議立奏凡上游中游下游每一段中甲年開口者乙年若再開口卽著總辦以下照甲年報銷銀數賠出一半庶作工時不敢不認真而復開改名之弊不禁自止矣一武弁宜認真巡察也山東沿河設有河勇五營專司防汎有險則作占盤埽無事則晝夜巡邏一有狼窩蟻穴滾溜壑陷等險立即報驗修築自可立臻平穩消息未然乃近日陋



習專事逢迎上憲經過固必安排供給列隊送迎卽一佐貳一幕賓亦必酒食款留小隊護送而本分之  
河務早量之度外矣推原其故不過因缺額短餉借逢迎爲護庇之計擬請 飭下山東撫臣嚴行禁止  
所有辦差供給送迎餽遺等弊習盡爲革除倘有委員藉端需索准其揭稟查辦各該營官既無護符自  
不敢不認真盡職庶河營非逆旅而防守亦資得力矣以上四條委係多年積弊所在若能盡行革除自  
當永慶安瀾臣既有所聞不敢不言 上諭御史宋伯魯奏山東黃河積弊已深敬陳管見一摺所稱冒  
領贖銷宜嚴定處分收發各料宜設法稽查申明賠修舊例員弁認真巡察各條著山東巡撫嚴飭在事  
各員痛除積弊認真辦理嚴定處分一條並著凡有河務省分督撫認真查察遇有劣員務當嚴參懲辦  
○乙巳 上詣建福宮 孝貞顯皇后聖容前行禮○張之萬因病奏請開缺不允仍予假兩月○以蘇  
輯棊爲江蘇布政使丁峻爲浙江按察使○諭本年六月以來大雨時行永定河水勢漫溢順直各屬被  
災小民醵析離居深堪憫憫加恩著將江蘇河運漕米五萬石江北河運漕米五萬石卽在天津就近截  
留放賑其隨漕輕腐等銀兩一併核數提扣以備順直賑撫之需著王文韶會同孫家鼐胡燏棻督飭所  
屬詳查災區輕重的量分別核實散放務使實惠及民不准稍有弊混用副朝廷軫念民艱至意○丙午  
諭御史潘慶瀾奏東三省每年荒斃人犯太多請飭整頓一摺各省間刑衙門遇有人命重案理宜隨審

隨結以免拖累若如所奏奉天吉林黑龍江所屬近年以來每遇人命案件延不辦結以致監候各犯多  
弊罔罔其餘軍流徒罪各案尤多積弊殊非矜恤庶獄之道蓋依克唐阿延茂恩澤通飭所屬立限清釐  
認真整頓倘有前項情弊卽行從嚴參辦以挽積習而恤民生○丁未饒應祺奏甘回不靖勘修古城奇  
台縣城以資防守估計需銀二萬六千餘兩擬於歲撥新項後經費項下動用不另請款下部知之○  
戊申 上詣 奉先殿 壽皇殿行禮○總理各國事務衙門奏調查各關設立稅務司徵收稅鈔於同  
治二年間歲徵銀六百餘萬兩議給各稅司辦公費銀七十萬二百兩旋於六年添設山海東海等關歲  
徵銀八百餘萬兩加給經費銀至七十四萬八千二百兩嗣於光緒元年各關歲徵銀一千一百餘萬兩  
增添經費銀一百九萬八千二百兩續於六年新開口岸增設瓊海北海甌海蕪湖宜昌五關共新設十  
九關歲徵銀一千三百餘萬兩加給經費銀一百十五萬八千二百兩復於十四年各關歲徵銀一千五  
百餘萬兩並添設九龍拱北二關及購買緝私巡船加給經費銀一百七十三萬八千二百兩又於十九  
年添設龍州蒙自重慶及朝鮮之漢城各關加給經費銀一百八十五萬八千二百兩應經總理衙門奏  
准遵行在案茲據總稅務司赫德呈稱通商各關稅務司經費一事前經先後奏准每年撥發關平銀一  
百八十五萬八千二百兩之數而除臺南淡水兩關經費每年七萬二千兩停發外現在各關實發一百

七十八萬六千二百兩查西藏前關亞東一關尙未徵收稅課然不能不動用經費且新添蘇關杭關沙市思茅等關均經派有稅務司等前往惟前項奏准經費數目並無此新開之關在內且各關今年上半年所徵之數較去年上半年所徵約多至一百七萬兩竊有之關公務較繁辦公人等因之較多又加郵政在在均需費用祇可請准添撥以資辦公應請將年款一百八十五萬八千二百兩奏准之數改爲一百九十六萬八千兩并開具各關應添經費數目清單請飭各關於光緒二十二年八月二十五日起按月發給申請駁辦前來臣等查總理衙門原議各關收稅逾一千五百萬兩准其加增經費比年以來因收稅逐漸加增迭經奏請照章添給各該關經費均奉 諭旨遵行在案今因收稅加增并添設蘇州杭州沙市思茅等關又加郵政在在均須費用該稅司所請加給經費尙屬實在情形查請撥之數每月加銀九千一百五十兩每年合加銀十萬九千八百兩合前撥共銀一百九十六萬八千兩臣等公同酌核其所請增撥之數尙非無因應如所請照案撥給如蒙 俞允當由總理各國事務衙門分咨南北洋大臣暨各行各關監督並總稅務司於光緒二十二年八月二十五日如數加撥遵照辦理得 旨如所議行○鹿傳霖奏贍番糾眾出巢盤踞章谷勒令土司投彼不服開導添兵抗拒經臣飛飭督辦夷務知府羅以禮酌帶兵勇馳往再行開導如再抗違不能不示以兵威一面飭儘周萬順迅統各營馳赴打箭爐

駐紮以爲聲援並添調漢土官兵籌辦各情先後奏明在案臣卷查光緒十五年贛對番官責總策披吳常舉虐激變贛民羣起叛藏驅逐番官願仍歸川屬准駐藏大臣長庚咨川委員查辦彼時若乘勢將贛地收回勢順而易藏中亦無可詭詞乃當日計不出此僅將番官正法仍由藏另換番官且更添一琪布卽今日滋事革撤不遵之對堆奪古及夷惡吐布丹也又復增派藏兵八百名從此愈肆兇橫贛民益遭塗炭敢怒而不敢言積怨蓄憤蓋已久矣臣查悉情形因密飭羅以禮周萬順設法多覓間諜持示前往曉諭以離贛民之心而收其內亂之效茲據羅以禮先後稟報酌帶長勝右營勇丁兩哨督同卑和營都司劉炳勳帶營兵百名明正土兵二百名先行馳往章谷飭長勝右營參將李飛龍催調糧運全營駐紮道場以顧後路羅以禮行抵章谷駐紮齋寨與該番所踞新寨僅一矢之遙當派把總盧鳴揚親往開導該番仍敢玩抗相持添派番官防衛約有千數百人於寨牆徧開礮眼并有朱窩土司及喇嘛寺從逆之人相助情殊叵測羅以禮當卽催調李飛龍全營并就近飭調麻密孔撒白利三土司各派土兵五百名酌發口糧銀兩隨同官軍來章谷防剿至五月二十三二十五等日李飛龍及各土兵先後馳抵章谷二十六晨起李飛龍令營勇十一人前往河溝取水就近在齋寨左邊察看地勢意欲分駐附近民房藏有膽卅三十餘人齊出爭鬪仔仲所踞新寨近接民房乃竟號召番兵由新寨鎗眼施放鎗礮以晦擊明

連聲不絕長勝右營勇丁未及防備當被轟斃二名受傷八名羅以禮等見兵端已開其曲在彼且軍心忿不可遏亦卽督飭我軍率同麻耆明正土兵放鎗抵禦連傷贖番六名其時然馬公山梁住紮之番部牛麻娃亦率馬隊數十名接應贖番向前助逆幸我軍前哨勇隊駐紮老河口聞警應援左哨弁兵并白利土兵亦各奮力堵截當時鎗傷贖番四八生擒兩人並削取首級兩顆奪馬二匹番衆馬隊紛紛敗散我軍勇力太單亦卽收隊自固午後仔仲新寨與毗連之朱窩逆寨復用鎗礮向積寨環擊彈密如雨徹夜不思羅以禮等所居象樓窗壁均爲撞破彈子直落臥榻前我軍多方避禦僅傷斃勇丁一名羅以禮一面飛調周萬順提督全軍迅速馳援二十七日早贖番馬隊三百餘人自右山凹馳突而前意在撲我右哨營房羅以禮等分督孔撤麻耆白利土兵馬隊上前迎敵並令前哨營勇由老河口出隊截其歸路前後夾擊鎗礮齊施漢土各兵無不奮勇爭先贖番多受鎗傷力不能支向山後敗竄而去適有章谷喇嘛寺僧衆素與贖番勾結見其敗竄率黨數百人由山梁而下施放排鎗爲贖番接應我軍詰其不應助逆該喇嘛藉口昨日前哨鎗斃喇嘛二名係其寺僧稱欲報復嗣見我軍得勝始行潛退是日午刻山後擦澤地方復有朱窩從逆馬隊百餘人前來搗戰羅以禮卽與李飛龍劉炳勳各帶兵勇分督孔撤麻耆白利頭人帶領馬隊分路堵剿當卽擊傷數人逆衆敗去紛紛落馬逃入附近碉卡躲避我軍奪獲

戰馬六十六匹當賞給出力士兵均各歡欣鼓舞繼以禮等因念所住營寨近接未曉逆巢若不設法攻克斷難安枕且慮爲其所乘隨親督弁勇由營寨連放礮山大礮轟破賊番分紮對面水寨傷斃番賊多名餘均四散逃去又用鎗礮擊破右山朱高逆寨頭層牆窗數處傷斃逆眾甚多該逆防禦尙嚴未能得手是夜二鼓密遣孔撒麻書白利頭人暗帶士兵潛出寨後復將膽番分紮民礮二座放火焚燒番眾驚潰朱高逆眾亦於是夜將章谷後山民房燒燬二所并施放鎗礮擊我營寨傷斃放礮麻書士兵一名我軍亦放鎗回擊傷斃朱逆寨內賊番二名此膽番狙擊我軍先開兵聲并朱高土司章谷喇嘛助逆我軍連日攻剿獲勝固守舊寨之實在情形也二十九日膽番堅守不出我軍亦稍事休息彼此均於寨內施放鎗礮轟斃朱逆數人我軍亦傷明正士兵一人三十日膽番新添馬隊二百餘人高踞山巔俯視舊寨勢欲猛撲羅以禮劉炳勳等密飭麻書汎并劉煥章角洛汎并盧鳴揚分督麻書孔撒士兵一由山前要路直上堵截一由山後繞出斷其後路膽番分兵抗拒羅以禮復添派漢土兵勇分道應援合力攻剿接戰時許盧鳴揚親督鎗各軍亦鎗礮齊施番勇猛進傷斃膽逆多人逆眾潰敗適值雨大風烈收隊回營羅以禮等探聞膽民連年被番官苛虐均已離心思欲內亂此次除賊中番兵數百外所帶膽兵多由威逼而來機有可乘因自遣前諭據派親信職員羅增等密購間諜混入膽番賊巢親往切實開導以

覘民心之向背并傳齊各土兵頭人示以重賞飭令整齊隊伍多帶鎗礮定於夜間襲取朱瞻逆巢期於一鼓而克是日午刻據土兵報稱朱窩馬隊昨藏擦淫未去意在牽制我軍伺隙竊發必須先爲驅逐以除肘腋之患羅以禮等隨派員弁督率漢土兵勇馳赴擦淫朱逆據險憑高拚死拒戰我軍鼓勇而前有進無退相持一時之久朱逆力不能支紛紛敗竄傷斃數逆生擒一人奪獲青稞十數袋我軍亦被鎗斃麻喜土兵一名鎗傷勇二名遂將擦淫逆寨焚燬整隊而還羅以禮等以關外險遠糧運甚難現糧僅敷數日遲則饑潰堪虞而瞻番朱窩分紮各寨甚爲堅固非用火攻難期速破而四面分紮小寨勢同犄角又非先克小寨難期得手是夜二鼓天氣陰霾當飭穆秉文密派衛隊勇丁并麻喜孔撒土兵多帶火種分路潛往將番逆分紮右後前三處寨壘同時舉火焚燬聲震天逆衆不知我軍虛實驚潰逃散適派往之間諜羅增等亦皆帶同麻喜孔撒頭人次日工巴等陸續回營均稱瞻兵本已離心今聞開導無不感泣本欲縛獻仔仲無如其父兄弟均被拘繫恐遺族滅懇稍寬假若大兵直搗瞻巢該民等必爲內應願爲 聖朝良民而章谷大頭人旋巴高噶候登生珠達吉亦願具結隨同大兵進瞻先驅招徠羅以禮等復會商熟計我軍單糧艱勢難持久瞻民既已輸誠事機宜速遂與李飛龍劉炳勳等於三更後調集勇隊土兵多方激勵密授機宜番勇向前先攻朱窩逆寨乃該寨與瞻番新寨均環施鎗礮彈子

如爾我軍鏖戰不退肉薄而登立時攻破朱高逆寨衆向山後逃竄時已五鼓復督兵勇分攻新寨逆番  
仔仲見朱高逆寨已破知勢不支心無歸志黎明時率衆奪路出寨奔亦向山後遁逸兩寨先後  
攻克番衆自相踴躍及被羅被焚死者不計其數我軍自辰至午窮追亂山之中人馬困乏該處林深箐  
密恐有埋伏當卽收隊駐兵搜捕餘匪將新舊兩寨附近番逆悉數驅逐一面安撫連日受害良番復業  
安居此又連日攻剿出奇制勝連破逆寨瞻番朱高敗潰逃竄之實在情形也臣等迭據羅以禮等稟報  
各情當以各寨攻克瞻番遁逃軍事雖轉危爲安而瞻逆仔仲則忠扎勤乘間遁去前已參革之番官對  
堆奪吉夷喜吐布丹尙據瞻對老巢均屬罪大惡極必須懲罪致討且瞻民久苦苛虐情殷效順亦應速  
爲拯救其朱高土司甘心從逆章谷喇嘛寺僧衆通匪助勢均難寬縱現檄催提督周萬順統領防邊各  
營迅速前進相機分別勦辦已據報於六月初八日出關因慮兵力尙單復添調兩營陸續前進并調奕  
塘明正各土司士兵聽候調遣以爲後繼飭令周萬順與羅以禮會商定議妥籌進兵直搗瞻巢現仍密  
購間諜開導瞻民若能得手綱繳番官逆首三人卽可兵不血刃收回瞻地改設漢官管理收歸內屬仰  
託 皇上威福則邊民獲安疆圉可固以後一切事宜均可次第圖維實爲大幸至章谷朱高之案仍勒  
令朱高交出從逆助戰之人倘能畏威懾服尙可寬其既往由羅以禮等駐守章谷究明擇尤嚴辦以儆



其餘仍調築兩道追取朱高奪去章谷印信號紙乘公剖斷偏敵仍前抗玩亦由羅以禮分兵勦辦攻取朱高改土歸流其喇嘛寺僧衆亦勒令交出助逆之人懲辦以昭炯戒臣等惟有督飭屬萬順羅以禮等審慎從速斷不稍涉輕率致有貽誤蓋事機所值兵衅已開不得不大張撻伐爲一勞永逸之計臣等一面咨明駐藏幫辦大臣訥欽譚行商上詳敘喇嘛番不遵開導抗拒梗頑阻擊我軍先開兵釁情形責以不能約束曲庇瞻番之咎以致積禍稔惡上干天討師直爲壯該藏番當無可置喙也伏查關外用兵艱苦十倍內地道路非常荒僻糧運尤艱難萬狀我軍戰勝則番部土司無不懽服皆爲我用稍有挫失則羣起而與我爲難事將不可收拾此次羅以禮等率領偏師深入重地未敢輕動尙冀再三開導曲示包容不意逆番驕橫阻擊我軍先開兵衅朱高從逆喇嘛助戰其時尙提督萬順所統防邊各營因籌備糧運尙未出關救援不及我軍所駐之地四面逼近逆衆鎗礮環施萬難立足瞻番恃其地險礮固窳老我師又復時添馬隊憑高窺伺乘我之隙且我軍兵單糧絀飢渴堪虞稍有動搖邊事將不堪設想羅以禮堅忍不撓從容禦敵出奇制勝迭克堅巢以孤立無助之軍當四面烏張之衆卒使朱高破走瞻番遁逃轉危爲安厥功甚偉候補知府羅以禮膽識深穩調度有方請免補知府以道員仍留四川儘先補用併賞加按察使銜壽阜和左營都司留川儘先遊擊劉炳勳出奇制勝謀勇兼優請免補遊擊以參將留

川儘先補用並 賞加副將銜管帶長勝右營副將銜儘先補用參將李飛龍等出力請免補參將以副將仍留川補用直隸州用四川候補知縣程秉文請 賞加四品銜鹽大使職銜羅璋請以鹽大使留川補用阜和左營右哨千總雲騎尉世職劉煥章請免補守備以都司留川儘先補用並 賞戴花翎等阜和左營角洛汛把總右營外委盧鳴揚請免補把總以千總儘先補用並 賞戴藍翎長勝右營前哨千總李鳳寶請免補千總以守備留川儘先補用並 賞戴藍翎以上各員皆身親行陣奮勇立功實屬異常出力相應仰懇 天恩俯如所請敕部核准以勵軍心而作士氣其餘在事出力人員與土司頭人等及傷亡各兵勇容臣查明再行開單分別奏請獎卹恭候 恩施此後事情俟提督周萬順馳赴前敵與羅以禮會商籌辦稟報至日續行奏報又奏 正續摺問承准軍機大臣字寄光緒二十二年六月初六日奉 上諭鹿傳霖奏聯對番官現復帶兵出巢越界侵擾不服開導及擬辦情形一摺聯對番官上年與明正土司越界搆兵經鹿傳霖等將駐聯對番官先後撤參均經降旨允准乃該革番官並不遵照撤換近復帶兵越界滋事干預章谷土司案件勒令書立投聯對番官道令委員前往切實開導仍敢玩不遵從添兵抗拒藐玩梗頑形同叛逆自應懾以兵威著鹿傳霖卽飭羅以禮出關再行開導以利害一面咨明酌欽轉飭商上如其稍知悔禍領兵回巢准從寬免其剿辦倘仍執迷不悟卽著厚集兵力妥

籌進勦惟打箭鑪與滇邊相通該處教民雜處尤恐旬約爲患該督務當穩慎以圖不可任其越界侵擾亦不可因此激成邊衅是爲至要另摺奏委員李毓森俟抵印度時密爲偵探等語與前在電諭迥相照合卽著照所議辦理將此由四百里諭令知之欽此遊 旨寄信前來伏查瞻番積玩已久瞻民受害已深度勢審時亟宜復我疆圉以固門戶此次番官仔仲則忠扎滿又復帶兵出巢盤踞章谷情形極爲狂悖臣派委候補知府羅以禮帶勇出關親往開導彈壓尙冀略示兵威俾知斂跡再作徐圖乃該番公然藐抗並敢乘我不備鎗斃勇丁二名受傷八名兵衅已開不得不認真勦辦所有勦辦獲勝及籌辦情形臣已另摺奏報至打箭鑪距滇邊尙遠本處教民無多該教民與番衆氣類迥殊平日卽有格格不入之勢卽瞻對地方距打箭鑪亦尙七八百里尙不至旬約爲患臣仍不敢稍事疏忽現已嚴飭前敵將領及打箭鑪文武各員妥爲嚴防毋任越界侵擾旬約爲患以仰副 聖主軫念邊陲患患預防之至意上諭軍機大臣等鹿傳霖奏瞻番先開兵端朱高助逆疊次攻擊敗退現籌進勦情形一摺覽奏均悉瞻番既疊經開導抗不遵從並有朱高土司及喇嘛寺從逆之人相助竟敢開鎗轟擊官兵聲端已開自非大加撻伐不可業經知府羅以禮督飭兵勇將朱高逆寨磨番新寨攻破惟瞻逆仔仲則忠扎滿乘間逃遁助逆番官尙據瞻對老巢鹿傳霖務當督飭羅以禮會同提督周萬順等迅速率隊前往妥籌進剿並

調度塘明正各土司聽候調遣以爲後繼一面咨明訥欽譯行商上責以出庇瞻番之咎仍密購間諜閉  
導賊民如能網獻首逆兵不血刃是爲上策惟是事機所值難以逆料務當計出萬全斷不可稍涉輕率  
所有此次出力之知府羅以禮等當先行存記俟番案辦理完竣後再降諭旨另片奏教民不至旬結爲  
患等語仍著妥爲防範毋任越界侵擾將此由五百里諭令知之○松椿奏前因礪山豐縣有土棍勾引  
山東刀匪焚燬教堂情事據署徐州鎮陳鳳樓署徐州道阮祖棠疊次電稟均由奴才電達督臣劉坤一  
商定合力兜捕免致蔓延爲患劉坤一派委總兵劉光才率領步隊三營奴才酌派管帶正營左翼馬隊  
守備吳德麟管帶右營左翼馬隊游擊熊長春前往會剿旋經陳鳳樓等陣殺一百餘名及拿獲彭桂林  
等多名其大頭目劉士端亦經山東拿獲分別正法現在刀匪斂跡民教相安辦理均尙得法堪以仰慰  
宸廑惟徐州一帶平日伏莽尙多陳鳳樓仍將該馬隊留駐徐州以資巡緝一俟高梁刈穫地方綏靖  
再行調回下郡知之○廣成 上請 奉先殿 壽皇殿行禮○壬子諭御史烏爾慶額奏請酌添火器  
營官員兵丁額缺錢糧各摺片著管理火器營王大臣會同戶部議奏○癸丑追封禦回陣亡青海蒙古  
貝子納木希哩郡王銜照郡王例賜卹○諭依克唐阿等奏安東縣大東溝地方海潮漫溢成災請旨賑  
撫一摺本年六月十二等日大雨滂沱海水暴漲以致安東縣大東溝等處居民房屋倒塌淹斃人口當

經依克唐阿委員辦理急賑惟念海濱民情本多瘠苦現又罹此奇災湯祈離居實堪憫惻仍該將軍等寬籌賑款查明被災輕重酌給賑恤毋任失所另片奏海城縣等處東西沒溝營地方河水漫溢成災均有坍塌民房情事以及蓋平等處亦均被水災著一併妥籌撫恤以慰災黎○諭御史秀林等奏五城捕務廢弛請申明舊章以備稽察一摺五城命盜案件向由該城司坊官驗明呈報山東道按限催比乃近年以來司坊各官皆因規避處分不肯隨時呈報以致該道無從稽察殊非慎重捕務之道嗣後五城地面遇有命盜等案著該御史嚴札各該司坊懷遵舊章隨時呈報倘有遺漏隱匿情弊卽由該城御史指名嚴參以重捕務而靖地方○秀林等奏五城司坊官承辦詞訟而緝捕命盜之案尤關緊要誠以筆數之下五方雜處最易藏奸不同外府州縣便於稽查故非公正廉明之員不能勝任無愧自捐例一開膺是職者非致富之商人卽年滿之書吏平時未讀詩書不知禮義廉恥爲何物遇有詞訟專視人情財賄之重輕以敘供招以判曲直仕官之場竟同市儈至竊盜案出在宦家者不過往驗一次平民則置之不理又安望破案乎甚且縱役庇賊坐地分贓以致京師重地竊盜滋多蓋賊有所恃而不恐也相欲正本清源非將司坊官改用正途不可查例賊兵馬司指揮有輪用進士知縣者副指揮有輪用舉人知縣者然數十年來不曾經見偶一到班正途人員又恥與商吏出身者爲伍因規避而改官故五城印

委各員並無一正途者今擬正指揮出缺以進士出身者揀補無人以舉人揀補再無人以五貢揀補副  
指揮出缺以舉人揀補無人以五貢揀補再無人以廩貢揀補吏目出缺以廩貢揀補無人以增附貢揀  
補監生吏員供事出身者概不准補其已經現任候補之員可於對品中酌改別官如此則仕路澄滄而  
宿弊可以盡革矣 上諭御史秀林等奏五城正副指揮等缺請以正途出身人員揀補等語著吏部議  
奏○甲寅予故吉林候補道李金鏞於吉林長春府建祠○乙卯諭延茂奏查明副都統被參各款據實  
覆陳並查出另有勒索威逼等情各摺片阿勒楚喀副都統富和前經給事中文和奏參欽差暨備及濫  
用非刑各款經延茂查明均有實據富和本應嚴議姑念該副都統前在軍營曾有戰功現已病故免其  
置議伊姪騎校英魁遇案釋放自便致招眾論筆帖式富山騎校雙山為該副都統代索錢壽各儀  
均屬有玷官箴僅予議處殊嫌輕縱英魁富山雙山均著卽行革職餘著照所議辦理至續行查出勒索  
刑逼案內之委員德力佈著先行革職由該署將軍咨行全福提同人設秉公研訊各情從嚴懲辦○丙  
辰電 諭饒應祺等劉四伏就擒辦理甚好羅布淳爾安插事宜著飭該局妥為布置○丁巳諭啟秀等  
奏特參倉監督開放兵米糶雜不堪請旨懲處一摺本年七月分南新倉應放銀錢旗蒙古兵丁甲米據  
該都統等呈進米標且稱該監督一味支吾任意刁抗著倉場侍郎查明放米情形據實具奏仍將應放

兵米迅行開放毋誤兵食該倉監督何以僅止廣瑞一員其漢監督因何未經到倉之處著一併查明具奏○戊午 上諭 壽皇殿行禮○以那彥圖爲崇文門正監督剛毅爲副監督○己未劉坤一奏總理衙門議覆前署南洋大臣張之洞陳奏出使經費一案應令仍解江海關存儲備放並以原奏內稱該關積存之數是否全有實銀事關庫儲重要應派司道大員會同江海關道將歷任存放欸目有無虧短切實結報鈔奏咨行遵辦等因當經派委江蘇候補道程儀洛會同江海關道黃祖緒詳細盤查結報去後茲據該道等先後稟稱此項使費係於光緒二年八月十四日第六十五結起各關奉文於所收六成洋稅分作十成酌提一成解滬存儲備撥旋因收不敷放又自七十一結起再提半成並將六成華稅一律照提解存聽候撥用現計自奉文經收起截至二十二年八月初十日止除歷任遵飭撥解各欸及奉墊怡和洋行不敷暨部購銅鉛等欸未歸外實應滾存庫平銀五十六萬三千八百二十兩有奇又日本紙票洋二千二百元會同逐一盤查委係實在在庫並無虧短情事由江海關道黃祖緒加具印給稟呈前來伏查此項銀兩既經委員會查存儲無虧自應飭令照案妥慎經理惟查滯運糧道各庫均係專設庫官誠以收欸較多庫儲重要所以慎收藏嚴出納也江海關以巡道監督關務自各國通商以來復兼管洋關每年經徵常洋稅鈔以及洋藥盤金爲數本鉅而又經收各關出使經費以及本省及各省應還英

德俄法借款亦均須先期解交該關存付是該關近來庫儲之重實較漕運糧道等庫尤爲緊要卽前署督臣張之洞請將使費仍解江甯藩庫亦爲豫杜私自存放起見苟筦鑰有人如漕運糧道等庫亦何至復有積弊第添官卽須添費一再籌思惟有在於上海縣縣丞主簿中酌擇一員俾令兼司庫務既與庫儲有裨仍於地方無礙應請 旨飭下各衙門核議施行除將印結咨送總理衙門查照外理合附片陳請下部議奏○桂斌等奏查庫倫章印辦事大臣有撫綏兩愛曼照料呼圖克圖之責奴才桂斌到任以來凡於沙馬愛曼各蒙衆多年被累不堪之虐無不加意剔除諭以大理人情務使心安而後已僅知辦所當辦無恤其他也惟於哲布尊丹巴呼圖克圖往還體制未能認真數月以來迄無定議彼此相見之際多俟參商而公事之間備極融洽若此因循日久究非所宜檢查理藩院則例僅有西藏通志一條內載駐藏大臣總辦國藏事務與達賴喇嘛班禪額德尼平行等語至庫倫大臣品秩是否與駐藏相埒哲布尊丹巴較之達賴班禪分位是否相同應否一律並行抑或別有專例相應請 旨飭下理藩院查明咨覆以便恪遵下所司知之○庚申以 慈禧端佑康頤昭豫莊誠壽恭欽獻崇熙皇太后駕幸頤和園 上詣瀛秀園門恭送○辛酉以廂爾喀副使薩達爾尊達事熱齊雅扎罕齊業第熱在京病故子卹銀二百兩○論軍機大臣等瞻對之事干涉達賴恐舉動藏中大局現已添營進剿能否得手著鹿傳霖



隨時電聞○是月德意志國新簡駐華使臣海靖抵任○美利堅國使臣田貝回任

八月癸亥朔 上幸頤和園詣 慈禧端佑康頤昭豫莊誠壽恭欽獻崇熙皇太后前請安駐蹕○甲子

上還宮○駐俄欽差大臣許景澄與華俄道勝銀行訂立東省鐵路公司合同十二條○德壽奏前准總理各國事務衙門咨自同戶部議覆著兩江督臣張之洞奏江西在籍紳士蔡金臺等稟請將高安縣地方設立蠶學堂考求種植所購浙湖桑秧蠶種及新出繭絲均准暫免釐稅一摺奉 硃批依議欽此鈔錄原奏咨行欽遵辦理等因到部當經行司遵照茲據布政使翁曾桂詳稱查江西地多低窪輻輳水患物產所入事苦維艱倘遇秋收歉薄四野嗷嗷益困不可支欲爲之開闢利源惟蠶桑可補農事之不足者江西爲禹貢揚州之域有厥篚織貝之文隋史地志豫章一年蠶四五熟則江西之宜蠶從諸古而已然且蠶性喜暖江西界綫在地球東北距赤道二十餘度與江蘇浙江氣候相若靜察天時土性知於種桑育蠶其爲相宜雖經紳士蔡金臺等請於瑞州府之高安縣地方建設學堂舉辦蠶桑然僅在偏隅小邑利源恐難大開是應於省城適中之地廣植桑株設局開辦以爲先倡庶民間鼓舞得興可期大效遵即籌款設局札委現署南昌府知府江毓昌總司考核通判閻廣良提調局事務候補縣丞江忠修等隨同照料延聘熟悉蠶桑事友一人招僱浙江蠶師三人於省城東北隅永和門內購得園地一段縱橫

百數十丈徧植湖桑建造育蠶繅絲舍屋宇六十餘間爲教導鄉民接桑養蠶公局先就本地野桑試育  
春蠶召集鄉民類悟子弟給以飯食使之學習飼葉接繅諸法長年住局俟學成之後量其才能推升工  
師酌給辛資令分赴各州縣轉相傳授並先於今春札委候補主簿萬中傑赴浙江湖州購到桑秧十數  
萬株馳紳民承領分種不取一錢使知簡便易行數日之內卽已發盡無餘而願領者猶紛紛未已察看  
民情頗甚踴躍復刊刻蠶桑輯要全書並種桑秧簡便法及種桑事宜養蠶良法頒發十四府州飭令率  
屬審察土宜廣爲勸導實力舉行不得虛應故事以期日起有功惟市經創始速效難期擬明春集資多  
購湖桑徧發種植並收買蠶繭俾民間知有銷路利之所在自必私相爭趨風氣廣開地方可臻富庶至  
建局購桑以及薪工費用均係就地設法勸募籌集並未動用庫欸等情詳請具奏前來臣查江西民情  
困苦實因物產無多審查土宜惟種桑養蠶可爲民間無窮之利報聞○乙丑賜郡王銜貝勒載灃第二  
子名溥儒○諭軍機大臣等有奏參知州貪劣各欸請飭查辦等語溥儒直隸定州知州徐慶銓嗜好  
甚深積壓案件縱令伊子與丁役李連洲等狼狽爲奸無惡不作並有逼勒事主改刻爲竊侵蝕捐欸入  
己情事著王文韶按照所參各節確切查明據實具奏毋稍徇隱原片著鈔給閱看將此諭令知之○丙  
寅諭軍機大臣等陶模董福祥電悉據報關內外肅清大局已定惟安插悍衆收捕殘匪應責成派出各

員妥慎經理鄧增著赴固原提督本任所有海城逸匪卽著該提督就近查辦毋使漏網一俟辦理完竣

地方平靖卽著速行馳奏以慰盛懷○丁卯祭先師孔子廟遺榮祿行禮○諭御史鄭思賢奏捐復舉

人有闕名器請飭核議並請停止報捐舉人及推廣道府捐章各摺片著戶部議奏○諭李秉衡奏查明

貧劣武職請分別降革一摺候補副將周保林隱匿軍情經李秉衡查出又復任意辭張實屬狡詐不堪

造就請以守備降補不足職辜著卽行革職候補游擊房景山任情攤派罔利營私不知自愛著一併革

職以示懲儆○戊辰祭社稷壇上親詣行禮○上幸頤和園詣慈福端佑康頤昭豫莊誠壽恭

欽獻崇熙皇太后前請安駐蹕○諭前據啟秀等奏參倉監督開放兵米攙雜不堪請飭懲處一摺當諭

令倉場侍郎查明具奏茲據祥麟廖壽恆奏稱南新倉本年七月應放旗甲米係遵照部章二陳一

新搭放滿監督廣瑞並無支吾刁抗情事惟措詞失當殊屬不合漢監督劉啟翰是日因非值班之期到

倉稍遲究有應得之咎廣瑞劉啟翰均著交部議處○諭鹿傳霖奏辦理松潘賊番出力員弁擇尤保獎

并擬定番民劃清川甘界址各摺片四川松潘之下色坐及雙寨甲借鳴爾壩等處賊番勾結甘省楊土

司所轄打拉等溝迭次出巢焚劫傷斃兵勇經鹿傳霖札委松潘鎮總兵夏毓秀相機剿辦該總兵於四

月二十日統率兵勇出關迭克堅壩擒斬要匪該番等畏罪乞降縛獻匪首剿撫兼施甫及兩月將歷年

刻殺各匪辦紉川境一律肅清辦理尙爲妥速所有在事出力之提督銜松潘鎮總兵夏毓秀著交軍機處記名遇有提督缺出儘先題奏補用副將韓國秀著免補副將以總兵記名簡放并賞加提督銜留川補用游擊黃仕明著免補游擊以參將仍留原省儘先補用并賞加副將銜四川儘先守備張輔祥著免補守備以都司儘先補用前雲南元江直隸州學正周孝植著免選本班以知縣留川補用並賞加五品銜四川補用都司張錫齡著以都司儘先補用四川儘先守備楊國棟著免補守備以都司儘先補用候選郎中唐鴻學著以知府不論雙單月歸部選用四川補用都司李朝桂著俟補都司後以游擊補用試用訓導何安瀾著以本班不論雙單月儘先選用廩生湯聘之著以訓導不論雙單月儘先選用附生歐家書著以從九品不論雙單月儘先選用以昭激勸至所請將已革文武各員開復原官銜之處著該部議奏○己巳諭依克唐阿等奏查明 福陵 昭陵應修各工情形較重請擇吉興修一摺著欽天監於本年八月內選擇吉期行知依克唐阿等遵照敬謹興修以昭慎重○鹿傳霖等奏 臣等承准軍機大臣字寄光緒二十二年六月初九日奉 上諭文海奏到川日期並籌商藏事情形一摺據稱藏番現在情形非懾以兵威於事無補擬招勇五百名帶領進藏以壯聲威著照所請並著迅速前往毋稍遲延所需餉銀每月二千兩卽著鹿傳霖按月籌給本日又據給事中吳光奎奏藏事孔棘宜籌備禦一摺夾塘巴

塘一帶爲四川入藏門戶該給事中請於該處設立漢官假以專權招徠川省商民前往墾荒並採辦礦產各節係爲預杜窺伺起見著鹿傳霖確查夷塘巴塘一帶情形如能招徠商民墾荒開礦洵於時局有益並著文海訥會商妥辦另片奏開辦藏務請於邊防經費等項內每年劃銀二三十萬應用等語各項協餉均關緊要川省有無別款可撥著鹿傳霖妥爲籌議至所請調安定勇五營移劄雲山一帶是否可行並著該督等酌籌辦理吳光奎摺片各一件均著鈔給閱看將此由五百里各諭令知之欽此欽遵除撥款募勇刻期入藏由臣文海馳奏外伏查西藏久隸版圖遠控藩部近障川疆形勢最關緊要近年英俄交相窺伺情形岌岌可危而藏番賦性愚頑罔知事務界行茶不遵開導加以違賴用事羣小煽惑頑梗尤甚臣傳霖上年奉 命來川查知藏事敗壞時切憂憂曾具摺密陳復請接展電綫謀收瞻對以爲防患固圉之圖正與吳奎光所奏用意相同特該給事中所請於夷塘巴塘酌設漢官招徠商民墾荒開礦并於雲山分駐防營各節似多窒礙難行者臣等公同細酌博訪周諮謹爲我 皇上縷晰陳之查巴塘夷塘各土司皆原有賴與營弁管轄鎮撫今再設漢官勢必改土歸流而後可惟各土司世守之地非其十分苛虐土民怨憤忿思內附斷難無故更張致令羣相驚疑輾轉句結反開衅端近年各土司弱肉強食不無鬪鬪相爭之事然必有罪可討有愆可乘然後愾以兵威如目前之時對未窩散於

叛亂則徑可改流此外各土司殊難概論況其地皆土番雜處絕無漢民又素崇信佛教喇嘛寺院林立雖均不安本分而土民甘受其盤剝亦不敢怨恨深蒂固既不能革除又不易化導種種情形斟酌設漢官尙待妥籌也又查要地一帶徒步皆山地氣寒冷五穀不生僅產青稞土民資以爲食惟巴塘附近數十里地勢平衍天氣清和亦有種五穀者細訪熟習藏路之茶商及久戍之老兵敘謂僅巴塘一區在兩山之間地氣較暖可種五穀餘地皆難種植非地果可耕而土民不知樹藝也五穀既不能生何能招民墾種此開墾之難也至於五金礦產傳聞關外各土司地方所在多有而土番性情益愚每憇惜之以爲寶山決不許人開採卽內地土司及四屬夷支凡產礦之區其性大抵相同昨因開辦打箭爐礦廠幾至滋事迫再三開導明正土司始勉允其結試辦半年內地且如此費手况關外之民頑梗尤甚此開礦之難也至於調勇駐紮雪山尤有難焉者查入藏之路自出關至折多山以西崇山峻嶺異常寒積雪常年不銷之山甚多土人皆謂之雪山於此而欲修治道路設立村店艱險萬分難施工作而勇丁之徭運糧運之勞費徒苦士卒耗帑餉雖有濟也原奏又慮英人利誘諸夷直來巴塘與塘求請口岸恐許拒兩難欲早爲經營以期保藏且謂外國各島一經懸旗他國卽不過問誠如所言則巴夷兩塘固明明中國之地各國皆知較鑿旗者爲尤確英人果遵公法自不能無端佔據如其肆意侵陵我卽極力經營又何

能禁彼之不來且內地尙稱通商何有於邊外是亦未足以杜英人之窺伺也原奏又稱英人佔踞樹漿  
廠在雲南西北境與藏地相接物產之饒每歲徵稅十萬等語詳查博訪不知其地惟查有阿薩密一區  
本屬野番之地英人近年收服番家闢地種茶頗稱繁殖其地狹而長綿亘數千里西近獨有嶺東抵雲  
南維西牘界南近雲南野人山北則遙對江卡惟隔狹狗獠雜諸野夷該給事中所云或卽指此考江卡  
在巴塘以西察木多以東英人若於彼地逐漸誘種野夷以窺江卡等處不惟藏地堪虞卽滇南亦屬可  
慮臣等惟有隨時設法圖維嚴防後患不敢少涉疎忽再通藏別有一途由德爾格忒土司轄境直達察  
木多較大路頗爲捷近一俟打箭爐電綫工竣接展入藏應由此路施工設法駕馭該土司當可遊辦其  
再由察木多至藏則該番有無阻撓尙難逆料方今藏事孔棘禍機已伏而藏番其頑僻強固存一暗恃  
俄人之心益堅其嫉惡英人之志因而輕藐漢官違抗 朝命殊不知俄連而英近藏弱而英強設再肇  
衅端將俄人未至而藏已不支英之不遽取藏實忌俄之與爭恐兵連禍結耳臣文海奉 命入藏當會  
同臣訥欽竭力設法再行詳加開導示以 天威儻能漸就範圍尙可徐圖補救臣傳霖現仍督飭進攻  
贛巢期於必克仰賴 皇上威福得以收復三聽卽當設法流官妥籌善後查贛對界在巴塘茨塘之間  
曠地若歸內屬各土司亦必聞風震懼再爲隨時酌量情形相機辦理以防邊患而固藩籬臣文海卽於

此次入藏之便沿途留心查看應如何變通辦理以期預防外患之處再與傳霖商酌會同妥商辦  
辦以仰副 聖主綏靖邊陲之至意至該給事中所謂撥甘肅新餉防邊經費均係要款勢難拮注即川  
省正值添撥巨款之際亦實別無可籌關外既難於鼎甕駐營自可無須巨款統容傳霖隨時妥酌籌  
商分別奏明辦理 上諭軍機大臣等鹿傳霖等奏遵旨會商籌議保川圖藏情形一摺覽奏均悉給事  
甲吳光奎條陳各節既據鹿傳霖等查明事多窒礙即著毋庸置議惟現在藏事孔棘機已伏藏番其  
頑倔強隱有所恃致有悍抗拒情事鹿傳霖擬俟收復三瞻後議設流官妥籌善後文海擬於入藏之  
便沿途察看情形酌辦所籌均尚周妥即著該督等悉心籌畫查明由滇通藏道路斟酌妥辦總  
期自固藩籬消弭隱患用副朝廷慮念邊陲至意將此由四百里各諭令知之○德應祺奏行軍以糧食  
為先轉運尤重新疆自甘回不靖調募馬步營旗赴甘助剿並分防玉門安西敦煌及哈密羅布淖爾等  
處嗣逆回西竄臣與署督臣陶模電商飭調赴甘新軍出關回援加派哈密防軍進駐安敦另調南路提  
領標練各營扼駐疆境軍事孔亟需糧亦股關內甘肅關外安哈向俱坐糧無多一經駐兵採買價日騰  
貴春間督標新軍進規大通甘省各州縣供資糧料扣繳時價過昂勇丁殊形艱苦自回抵玉門與本省  
新軍會剿搜追用糧益夥前據安西直隸州知州董麟其報加價尙可訂購近漸搜羅殆盡無論如何加



價安屬均無糧可採豌豆一項每市石增銀至七兩有奇覓顆粒購求不得請由肅州哈密提運接濟而安西距肅州七站距哈密十一站訪據肅州直隸州知州廖振喬電復糧料每市石採運各價合計需銀八兩五錢不能稍減哈密路遠更須計程遞加其羅布渾爾一路卡克里克紅格峽等處共駐馬步六七營旗復須安插撫回數千羅境勸辦屯墾未久無糧可買必須由喀喇沙爾糧局之庫爾勒車馬驢等處採提撥運計程均在二十站內外若派兵至敦煌鹽交界之處迎護接解共約三十餘站運致尤難豫計臣思軍臨前敵遠道追逐血戰嚴防實屬異常勞苦各兵勇餉有限糧價無常非格外津貼不足以恤兵艱而作士氣擬請新軍在關內支領糧料按照甘軍章程津貼糧價四成給領造報自肅州至哈密自庫爾勒至卡克里克以前各營旗支領糧料概照新省例價扣繳不敷採運腳局費俱由公家支發歸入軍需項下作正報銷如此量予變通庶兵食無虞缺乏士馬益資飽騰矣從之○庚午 上諭 醇賢親王圖嵩 皇本生妣金棺前行禮○諭軍機大臣等有人奏福建候補知縣辦理商務局姚近范游庸庸兼管後局支應任如芬機器局蘇紹良朋比為奸乘紕北失守私盜公款或匯廈門或匯上海廣東任如芬得銀三十萬兩姚近范得銀十萬兩蘇紹良得銀二十萬兩任如芬改省江蘇姚近范欲捐道員蘇紹良欲捐知府臺北失守庫儲祇二十三萬任如芬稟報七十萬之多臺灣新海防捐尚有五六十萬

亦飽私等語所奏各節究竟有無其事著邊寶泉查明具奏將此諭令知之○鹿傳霖奏查贖逆番仔仰則忠扎滿繼踞章谷先開兵衅並朱富土司助逆經一等派去之知府羅以禮督兵攻剿獲勝仔仰遁逃及續籌進兵情形業經馳奏在案其時提督周萬順已統防邊各營於六月初八日由打箭爐起程出關旋據稟報出關之後山路崎嶇瘴雨蠻煙荒涼萬狀前行所過終日絕無人跡沿途溪澗甚多均無橋梁軍士涉水而渡寒冷刺骨時當盛夏雷電頻聞有冰雹夜間設帳露宿士卒多染疾病又以運送軍裝需用烏拉時須催換以致軍行遲滯途中搜據派往問濞探報已革贖對番官對堆奪首夷器吐布丹僞稱贖王並授仔仰則忠扎滿為僞元帥自岫自固逆跡昭然偵知大軍出關即將中贖喇樓木寨十餘座處處設兵逆巢則盡用藏兵防衛不准贖民近身並將贖對得力頭目禁錮數人嚴防內變入贖隘口均設重防并將雅龍江大橋拆斷柯玉卡恩覺科均派仔仰率其悍黨扼紮以圖死拒該提督詳查地圖一日溝為入贖要道麥科地方為三贖咽喉由道場以至然魯科由章谷以至然馬公山兩處亦係入贖要隘而三路均可至麥科其地均山深箐密險峻異常探聞該逆各路均已設防攻剿宜分三路進兵使其備多力分應接不暇較易得手查逆番於一日溝修築木城岡卡三座守禦甚嚴隨派副將李章管帶壽字副中營並都司曹懷甲管帶長勝中營合軍由一日溝進攻並派先已到章谷之參將李飛龍

管帶長勝右營由章谷取道然馬公山進攻該提督自率新健營暗襲然魯利三路約期均抵麥科並分調明正麻書孔撤各土兵以爲三路鄉導一日溝一路於二十三日辰刻開隊各帶乾糧李章派管帶朱蘭亭率左哨由左山梁進後哨由右山梁進李章自率中右兩哨會同曹懷甲率中前左後四哨並明正土兵馬隊由溝直入十五里至桑猶地方松林深處李章等疑有伏兵用鎗轟擊果有馬步賊四五百人突出接仗鏖戰數刻勢不能支且戰且退李章等揮兵追剿轟斃步賊二十餘人馬賊五人戰馬十六匹割取首級七顆餘賊受傷奔墜巖下者甚多我軍受傷十一名乘勝直進又十五里抵柯玉卡逆番洽桑巴帶領藏兵二百名督同瞻兵馬隊千人拒守磐石隘口雜以荆榛內修木城一座寨樓三層高約數丈環列鎗礮向外轟擊我軍奮勇向前自午至申攻擊三時之久傷亡勇丁三十餘人城寨堅不可拔長勝中營文案張志騏在後督隊見勢不支揮刀立斷一勇衣袂示以退者必斬復趨紮猛攻仰視兩山壁立無路可通李章等急選奮勇數十名派令得力哨弁尋路攀藤而上路險幾不容趾軍士鼓勇升削剽前進直抵逆寨後山用鎗下擊繼以礮石立斃番賊十餘名賊中潰亂李章等乘勢轟倒石壁斬開荆棘纒擁而入賊眾乘馬奔逃我軍連環鎗擊當斃騎賊六名受傷者以百數十計轟倒戰馬二十餘匹獲馬一匹焚其寨卡一面跟追二十餘里至一日溝章谷地方天晚收隊稍憩該處附近喇嘛寺聽僧七十五

人來營請降當爲收撫詢知距此二十里恩覺科地方有烏魯木奶逆寨二座逆番肉本原帶威勝馬隊一千五百人駐守加以柯玉卡敗回之賊不下二千餘人麇集一處李章曹懷甲會商以賊番敗潰之餘利於猛攻卽於夜半燃薪速進黎明行抵恩覺科賊已驚烏魯井屯木奶寨遙見山梁有賊百餘人憑高拒守李章等分兵五路直前仰攻先將山梁之賊轟斃多名餘衆潰散滾殿跌斃者不計其數遂奪山梁揮衆直抵寨前寨內鎗彈如雨我軍奮力攻擊傷亡勇丁二十餘名時已將暮曹懷甲親放火彈打入逆寨燒賊十餘人李章復用噴筒燒燬木城賊衆由後挖開寨牆狂奔自相踐踏號哭之聲山谷皆應我軍追殺一陣斬賊尤多奪獲番鎗十六桿刀十三把帳棚毡毯酥油糌粍無算追奔十餘里賊已遠颺卽在松林間露宿次日整隊進次麥科此壽字副中營進剿一日滿獲勝迭克險隘之實在情形也至長勝右營一軍先隨候補知府羅以禮在章谷擊走騰會仔因朱滿土司仍行抗匿已撥兩哨帶同土兵進剿朱滿嗣接馬順札調三路進兵羅以禮卽派長勝右營幫帶馬駿帶領兩哨勇丁與試用縣丞羅萬華督帶明正土兵由然馬公山前進行至特龍溝地方突遇埋伏驍兵馬步千餘人彼此相持馬駿先遣明正土百戶崔保前往開導繼令羅萬華宣布告示曉以順逆驍兵本已離心又驍兵威遂紛紛散去其駐守然馬公山梁番兵聞我軍業已入險又聞日滿之險已失亦均遁去馬駿等長驅直入提督周

萬順先於二十二日率新健營及明正土兵馬隊由道場渡河該處僅皮船四隻至二十四日全軍始渡  
畢直抵然魯科沿途山勢險峻異常該逆設防山頂自恃地險不虞我軍猝至又先將原防番兵三百名  
調撥一日溝只留夾科士千戶名獨敢者帶兵二百名防守獨敢聞我軍已至來營投誠當令隨營進尋  
險隘燒燬木卡并招降附近喇嘛寺院二座喇嘛番三百餘人夾科土百姓百餘戶瓦迷帳房百姓二百餘  
戶是夜師行三十里進次德卡適遇大雨將士皆露立林中衣裳盡濕饑寒交迫二十六日黎明途中即  
有中哨頭目十餘人來營具結投誠午後軍抵麥科仔仲已率悍黨遁去招降者復千餘家查知仔仲因  
聞各處險隘已失膽兵散去率悍黨十餘人逃回中哨老巢此又長勝右營分兵由然馬公山進剿及新  
健營由然魯科進剿飛渡天險收撫降眾之實在情形也伏查一日溝營能濟然魯科等處著名天險昔  
年前督臣琦善等攻贖之役統率大兵進剿經年勞師糜餉傷亡士卒迄未得手此次提督周萬順統率  
僅止四營竟於數日之內迭克要隘直入險阻攻抵麥科官民聞之無不驚為神奇刻已進逼中哨逆巢  
現復調運開花礮到師行進攻惟聞逆巢甚為堅固中哨難能江該逆拆橋固守極為嚴密但大軍已據  
其腹心攻剿當易順手此皆仰賴我 皇上威福將士用命故能奏此奇勳等仍飭周萬順妥籌圍攻  
並廣布示諭賊覺聞該開導曉諭民同心向化如能相機縛獻逆首更可不勞而獲飭令克寨之日嚴束弁

兵秋毫無犯以慰贖民來蘇之望惟此次該將卒等於燧煙瘴雨之中誓死奮勇立破奇險要隘多感尤屬異常出力自應隨摺保奏請 恩施前格 記名提督協勇巴圖魯周萬順騎勇沈毅調度有方擬請仍交軍機處記名遇有提督缺出儘先題奏并 賞給三代一品封典總兵銜都陞阿巴圖魯儘先補用副將李章冒險攻堅身先士卒請免補副將以總兵 記名簡放並加提督銜升用游擊留川補用都司曹懷甲施放火彈奮勇破寨請免補都司以游擊仍留原省儘先補用並加副將銜水營營參將佟在棠道路險遠設法轉運軍火糧餉不辭勞瘁請以副將用先換頂戴指分湖北試用府經歷彭鴻年請免補本班以知縣仍留原省儘先補用 賞加同知銜並戴花翎分省試用縣丞羅萬華請免補本班以知縣分省補用並 賞加同知銜附生張志墮請以府經歷縣丞分省儘先補用並 賞戴藍翎相應仰懇 天恩俯准照獎以勵戎行而作士氣其餘在事出力員弁勇丁各土司頭人容查明開列清單另案奏獎至進兵攻剿中贍情形俟周萬順稟報至日續行奏報又奏朱高士司四郎多登久已貽投贍對為之爪牙前於贍番仔仰盤踞章谷抗拒官兵復敢添兵助逆已屬罪大惡極臣仰體 朝廷寬大之恩於仔仰敗遁之後仍飭羅以禮妥為開導令其交出助逆之人及奪去章谷印信號紙懸候斷案仍可免其剿辦尚冀懍於兵威或知悔悟乃據羅以禮來稟迭次派令把總盧賜揚等親往開導該土司一味推延仍

前獲玩并於沿河各隘俱紮馬隊防範甚嚴不遵州導又與麻書孔撤土兵轉關互有損傷孔撤麻得白利三土司亦憤其背叛皆願各派得力土兵前往攻剿難以禮以朱窩既不悔罪恐其於大軍進剿之際出擾章谷牽制我軍暗助瞻番因亦乘機分兵攻剿并以章谷喇嘛寺前爲瞻番助勢雖來營請罪仍未交出不法之人其心叵測不可不防止值大軍進攻瞻果之時遂與參將李飛龍都司劉炳勳仍駐章谷防範後路當派候補知縣穆秉文千總劉煥章帶領長勝右營前後各半哨及其衛隊督同麻書孔撤白利土司土兵四百餘名於二十一日由納林冲地方進剿並派章谷土兵一百五十名隨後應援二十二日穆秉文行抵拒納林冲五里之定遠地方見朱窩督禦守寨內虛難攻克因議分路進兵職員羅培等帶隊繞過對河麻書土司等分兵一由山後一由定遠瓦廓谷勇齊進穆秉文親率衛隊繼之鎗礮齊施夷衆不支爭開寨門循河浮渡各向深林逃遁我軍督隊直前及抵納林冲朱逆不戰而潰卽分隊追擊斃賊多名焚燬夷房七座奪糧牛羊馬匹甚多旋據信卡更遠各處暨朱窩頭人四郎仁青率領土民三十八戶投誠當予取結收撫並將所得牛羊馬匹賞還以安其心二十三日進兵馳抵更遠地方卽有更遠頭人嘎達及朱窩沿河土民一百三十餘戶亦均聞風歸降餘衆逃回朱窩逆寨負隅死拒二十四日穆秉文遂督漢土兵勇進逼朱窩逆寨分兵扼要合圍先焚附近逆寨民房二十餘座直逼前寨內

鎗礮如雨且寨險牆堅猝難得手是夜復派土兵潛行放火焚其礮房寨內勢益窮蹙次早復督令兵勇奮力攻撲午間寨內老土婦遣人乞降當卽傳令緩攻該土婦親自來營叩求免死穆秉文面加申斥開導仍令呈繳印信號紙並網繳其子及助逆之人該土婦求回寨商議再來請罪穆秉文允之詎意其回寨之後延至二十六日僅肯繳出印信號紙不允縛獻土司及助逆之人仍圖死拒穆秉文以其反覆偏強仍飭兵勇進攻遂將前寨門攻開一湧而進搜捕首逆乃該逆早已攜帶印信率其死黨擁護老土婦及其妻女拆開後寨牆垣逃逸分路追捕未獲查有通東科土司小路恐其由此逃遁已稟由羅以禮飛飭東科爾及德爾格忒各土司如該逆匪窺入立即網繳不准容留此攻破朱窩土寨逆首遁逃之情形也臣等查朱窩土司甘心背叛自取滅亡其罪實無可逭惟其圍困窮蹙之日老土婦已率頭人赴營請罪穆秉文應卽將其拘留再行開導示以恩信該土司或可出而請罪則操縱在我身於了結乃一味嚴責并縱令土婦回巢以致該土司及悍黨等畏罪遁逃并章谷印信號紙仍被攜去誠屬渠魁未獲案仍難結且既已合圍區區一土寨何以被其潛遁知縣穆秉文辦理失宜實屬功不掩過等現仍責令上緊追捕務獲以贖前愆嚴飭各土司不准容留并飭羅以禮等就近料理善後事宜安撫降眾及被難居民詳查戶口逆產造冊呈報候臚對心再行妥酌辦理 上諭軍機大臣等鹿傳霖奏進剿贖對迭克



險隘情形一摺覽奏均悉已奉諭對番官對堆奪吉夷島吐布丹等偵知大軍出關率其悍黨拒守一日  
溝等處負隅自固提督周萬順總統防務各營三路進攻數日之間迭克要隘現已進逼中瞻逆巢辦理  
尙爲得手仍著該督飭令周萬順等嚴督隊伍將中瞻逆巢迅速攻克總期懾服軍威不敢再萌反側爲  
一勞永逸之計方爲妥籌前據該督奏知府羅以禮等攻破朱窩逆寨瞻對新寨請旨獎勵當諭令將羅  
以禮等先行存記此次所保出力各員仍著先行存記俟瞻對全境辦理完竣後一併降旨另片奏朱窩  
土司四郎多登經官軍攻破寨門搗帶章谷印信號紙潛逃等語知縣穆東文於該寨老土婦來營乞降  
一味嚴以縱令回巢暫屬辦理失宜著交該知縣趕緊將四郎多登追捕務獲以贖前愆餘著照所議  
辦理此由四百里諭令知之○辛未諭王文韶張之洞會奏請設鐵路公司並保盛宣懷督辦一摺直  
隸津海關道盛宣懷著卽飭令來京以備諮詢○壬申 上詣 奉先殿 壽皇殿行禮○甲戌 上幸  
頤和園詔 慈禧端佑康頤昭豫莊誠壽恭欽獻崇熙皇太后前請安駐蹕○陶模奏甘省自去歲軍興  
以來需餉浩繁前督臣楊昌濬兩次請撥銀一百七十萬兩內有存積變價抵算銀九萬餘兩實收一百  
六十萬兩之譜連上年常餉九十二萬兩共合二百五十餘萬兩截至二十一年底止除西軍八營校餉  
一旗係照奏案在四分減平內支餉不計外已用銀三百餘萬兩實虧銀四十餘萬兩曾於本年四月初

五日請備摺內奏明在案原冀軍務早竣用費可省故摺節估計請添本年軍餉銀一百五十萬兩無如歸還尚欠僅剩一百餘萬供支數月又將營盤盤接部咨裁營節餉業已次第辦惟撤營甚難情形操切卽滋事端既須找清存餉又應發結 恩餉欲省此後之款斷不能惜目前之費刻下竭力刪併月餉約已減半所留支領行餉之鄧增藩效蘇馬福祿等所部各營尙難速改坐餉濕屬遺孽及安肅一帶南山另匪迄未剿除盡淨深恐乘虛竄擾勞兵力蓋有求省而不能多省者此軍餉不敷必須再請撥補之實在情形也更有轉運腳價一項前督 楊昌濬初請二十萬本屬從簡核估蒙准十萬原不敷用此項多係州縣墊發分起報領 前請撥餉時到任不久尙未深悉底蘊近核冊報始知去歲迄今已用銀四十萬兩有奇其間若軍軍湘軍陝軍豫軍糧餉器械不絕於道而本省一百十餘營旗之軍糧各屬之賑糧皆由異地採辦轉輸逾千里加以干戈紛擾查核價昂較諸平時價值或相倍蓰此又運費不敷之實在情形也以上兩項現經藩司督同糧臺委員連本年奉撥常餉統作已收通盤核算軍餉截至年底運費截至六月實虧銀八十餘萬兩若不據實籲請設有貽誤關係匪輕應懇再請添撥的款銀八十萬兩俾得還挪款而濟急需不敷尾數卽以存糧變價彌補據藩司會銖詳請奏撥前來 詳加查核軍餉之虧自去年運費之虧今年較鉅現在軍務漸定運費當可大減惟所虧八十餘萬兩實係刻不容

緩之款事關大局不得不據實陳明合無仰懇 天恩飭部添撥軍餉運費銀八十萬兩以應要需現查  
甘肅有虧無存新收自貨盤金扣存三成養廉等款銀四十四萬餘兩尙可就地撥用下短三十餘萬再  
由戶部另行指撥仍俟軍務平定彙案核實造銷得 旨戶部速議具奏○乙亥 上還宮○諭前據依  
克唐阿奏參東邊道張錫鑾把持稅務當經降旨將張錫鑾開缺交依克唐阿嚴行查辦茲查明前參  
各節詳細擬陳請旨懲治等語張錫鑾交部議處○丁丑 上幸頤和園詣 慈福端佑康頤昭豫莊  
誠壽恭欽獻崇熙皇太后前請安駐蹕○諭胡聘之奏總兵袁庸貪鄙執法營私振實糾參一摺山西署  
大同鎮總兵沈玉賈所募馬隊多方剋扣侵吞入己且有賄賂差缺情事現當整飭營務之際自應從嚴  
究辦以儆效尤著大同鎮總兵沈玉賈著卽行革職並將剋扣各款嚴行追繳所有通同行賄之殺虎口  
都司王丕緒擬補潞安都司陳紹虞候補都司陳紹輅試用府經歷賈象謙著一併革職○戊寅夕 月  
於西郊道凱奏行禮○上還宮○諭軍機大臣等李端綽奏考童滋事請飭查辦一摺據稱按試廬州六  
學文牛放場時查獲合肥縣匿名揭帖內稱賄賂秀才追考錄合肥童生出題後突有考官六七十人蜂  
擁出號口稱題目場外已經傳聞肆意滋鬧經教官稟請改題另出該童等仍復口稱此題外間亦知並  
有毀燬席棚毆打家人情事現已拿獲馬肇霖等二名交合肥縣收押等語此案情節究竟若何著福潤

確切查明派員清辦原摺鈔給閱看將此諭令知之○諭前據御史黃均隆奏參江甯藩司瑞璋貪贖各款當經諭令項舒翹確查具奏茲據查明覆奏瑞璋被貪贖各款查無實據惟於其子及幕友家丁均屬不能約束著交部議處伊子安徽候補道文弼任意冶遊有玷官箴著卽行革職知府用指分山東直隸州知州潘文超入幕多年聲名惡劣著革職永不敘用並驅逐回籍不准在江甯逗遛調署秦興縣本任碭山縣知縣陳守卓巧於營謀致滋物議著開缺另補現署邳州事候補知縣宗美人極庸惡難應民社著以府經歷縣丞降補署興化縣知縣俞熙雖無實在劣跡仍著調省查看道員穆克登阿查無迎合分肥及行賄情事均著毋庸置議○己卯 上詣 醇賢親王回寓 皇本生妣金棺前行百日致祭禮○幸頤和園○以關普通武爲內閣學士○庚辰興修 圓明園○辛巳諭軍機大臣等趙舒翹奏遊棍訛詐干涉地方官員請飭查辦一摺奏稱有湖南人曹秉樞自稱候選員外郎稟控署元和縣葉懷晉在鎮江挾妓冶遊被萃軍圍辱經伊排解懷晉允給洋銀四千元曹有墨據又據葉懷晉呈出密信一兩稱係胡家楨由信局寄來信內聲敘曹秉樞談及葉懷晉挾妓飲酒被流氓欲索巨款經曹秉樞代兌四千元之事等語覽奏情節支離虛實均應澈底根究署元和縣知縣葉懷晉先已撤任江甯鹽法道胡家楨著一併撤任交劉坤一提曹秉樞嚴訊確情據實具奏至曹秉樞是否捐納員外郎著吏部查明斥革

原摺著鈔給閱看將此諭令知之○壬午 上幸靜宜園○還頤和園○癸未 上還宮○甲申諭軍機大臣等有人奏疆臣濶職列款糾參一摺貴州巡撫嵩崑前在藩司任內需索供應遺失庫銀飭令官吏攤賠自升任巡撫後動支官項修理衙署地方官報災輒被嚴飭遵議府屬辦理平糶扣發款項獎安等縣被旱入奏迎延遵議災情文武稟報兩歧並不委員查勘並私添營勇積壓公牘信任家丁請飭查辦等語著以蕃黃槐森按照所參各節確切查明據實具奏原摺著鈔給閱看將此各諭令知之○鹿傳霖電致總理各國事務衙門稱電綫斷阻二十八日恭奉號電 諭旨欽遵進剿贖對克其險隘昨已馳奏今正攻其巢不日當可得手遼賴不遵 旨撤換番官縱其滋事訥欽若能嚴折以理彼當無可狡賴藏中尙無消息得信迅速電陳祈代奏又電稱頃接駐藏幫辦大臣訥欽咨稱贖對番官現經撤換照例擬送正陪兩員奏請 簡放等語查贖對已革番官精兵犯順業經奏明進剿刻正圍攻其巢可望得手自不宜再派番官訥欽奏時計川中咨文尙未到期屢催更換遼賴抗玩不遵今既申天討該遼賴始請更換似未便准行仍貽後患相應請 旨於訥欽奏到時嚴責遼賴庇縱抗延之罪應卽收回贖地 諭以前有功則賞之今有罪則奪之以示 朝廷賞罰大公之至意謹請代奏軍機大臣奉 旨鹿傳霖電悉贖對用兵係暫時辦法事定之後應否仍設番官當再斟酌妥辦訥欽尙未奏到俟奏到當諭以從緩再

辦不能因此廢責喇嘛轉生他蚌也藏事棘手該督等當通盤籌計切勿鹵莽並論文海知之○乙酉

上詣 壽皇殿行禮○諭軍機大臣等御史華頌奏江西徵收了漕以錢代銀現在銀賤錢貴請飭核減

錢數一摺著德壽體察情形酌量辦理○丙戌壽慶奏奴才欽奉 諭旨飭查金銀礦地設法興辦以供

國用等因欽此遵查熱河礦務招商採辦始自咸豐三年當經奏定章程儘採儘解並無定額每得沙煉

銀一兩以十成計算以三成爲正課以三分爲耗銀以一分爲解費餘銀歸商工本礦苗豐旺加增課額

沙縫以開奏明封禁其蒙古地方各礦得銀亦按十成計算係以兩成五分爲正課三分五釐爲耗銀一

分五釐爲解費一成爲蒙旗抽分如礦係民地按畝給予地價蒙古地畝則給抽分民礦設局招商由熱

河道給照詳明都統核辦蒙古旗分之礦由各該旗自行招商呈明都統給照升課民礦課銀解交熱河

道衙門兌收聽候撥用蒙古礦課解交都統衙門兌收就近抵撥兵餉年終統歸都統奏銷其金礦係由

商人易換銀兩照章納課銅鉛各礦抽收課耗派員解交戶部兌收餘銅餘鉛官爲收買併解部庫此係

熱河礦務例章歷久遵行在案先年開招之礦如承德府屬過山綫寧溝等處銀礦平泉州屬之錫蠟片

銀礦銀洞子溝銅礦豐縣屬之牛圈子溝銀鉛並出之礦喀拉沁王旗土槽子羅圍溝蒙古銀礦喀拉

沁中旗蒙古金礦均經先後奏明升課嗣因洞老山空或商力未速陸續奏明封禁僅有過山綫土槽子

兩處升課銀礦前因商力不支經直隸總督李鴻章派員前來接辦照依舊章按年抽課會經奏明立案此外尚有補用道徐潤請開平泉州屬之轉山子建昌縣屬金廠溝候補道李宗岱請開灤平縣之寬溝豐寧縣之大營子等處金礦均因出沙不旺尙未具報升課並有翁牛特王旗呈報開採該旗之紅花溝水泉子溝拐棒溝等處金礦機器尙未運到已經奴才札飭催令趕緊興工開採奴才於欽奉諭旨後卽分飭所屬及蒙古各旗欽遵辦理並派委熱河道滿多布爲督辦承德府知府福謙爲幫辦候補知縣繆桂榮爲總辦令其廣爲踴勦無論金銀凡有可採之區迅速呈明開辦其奴才衙門經理礦務奏咨事宜以及稽核礦務仍照舊章責成理刑司員認真經理以昭詳慎茲據熱河道滿多布轉據總辦委員繆桂榮以勘得建昌縣屬之各里各並與富連界雙山子朝陽縣屬之五家子等處金礦均可開採詳請核辦前來現當庫款支絀既有可採之區自應卽時興辦期收實效而廣利源除現在升課之逼山綫土槽子暨已經呈明開辦各礦照依舊章另行辦理外所有各里各雙山子五家子等處金礦卽由該道府責成總督委員繆桂榮廣招商買多集資本刻期興工認真採辦奴才仍不時催查予限一年之內卽行照章奏明升課至熱河地方煤礦向係奏明辦理由熱河道給照按年納課其已經領照納課之礦毋庸再行查辦得旨知道了並著督飭委員等認真開採以興利源○丁亥諭訥欽奏據員請補番官一摺

對番官員缺著擬正之四明多布結補授○戊子 上幸頤和園詣 慈福端佑康頤昭豫莊誠壽恭欽  
獻崇熙皇太后前請安駐蹕○己丑 上還宮○諭前據御史楊崇伊奏參江蘇巡撫趙舒翹勅遷湖民  
幾至激變及署元和縣知縣葉懷晉著名貪酷各節當經諭令龍湛霖確查具奏茲據查明奏稱趙舒翹  
崇實去浮勤求吏治被參各節均係訛傳卽著毋庸置議署元和縣知縣葉懷晉聲名狼藉怨端繁興著  
卽行革職○辛卯諭御史張兆蘭奏外省衙門濫用非刑請嚴行禁止一摺朝廷設立刑章本有定  
制外省衙門濫用非刑變經降旨申禁茲據該御史所奏各直省州縣仍有濫用各種非刑情事殊  
非矜恤民命之道著各該督撫嚴飭所屬謹遵欽此諭旨實力奉行倘仍敢陽奉陰違卽行從嚴參辦○  
龍福祥奏奴才前奏官軍營次獲勝連破賊巢生擒逆首立解河州城副請將文武員弁先行獎勵其餘  
在事出力員弁兵勇並懇 恩准其擇尤彙案保獎光緒二十一年十一月初三日奉 上諭在事出力  
文武員弁不無微勞足錄自應量予獎敘以示鼓勵著照議辦理等因欽此當經欽遵恭錄咨行去後伏  
查上年逆回搆變西寧疊疊而河狄應之西寧道路險阻而河狄地當衝要河狄不下則西寧亦未可進  
兵奴才奉 旨西征其時河州被圍已數月矣賊聞官軍之至以全力扼守洮河而洮河以西偏地皆賊  
又步步爲營或潛伏深林以誘我深入或大股來犯以撓我所必爭使少一頓兵則我將自困幸賴 天



威將士用命一破之於邊家灣再破之於康家崖急渡洮河賊又以五六千人憑河死拒河邊山頂築以  
堅牆鎗礮齊施軍不能進乃濟自上游繞出其後毀其堅牆軍乃畢渡又破之於三甲集爲賊堅巢地勢  
深險同治年間數次進兵所未能得利者也又山景古城進搗高家集賊衆數路俱不退避乃乘其死黨  
盤踞於四十里鋪以拒我軍其寧河亦圍攻如故是時官軍一由康家崖一由狄道西山口兩路進兵齊  
集於太子寺一齊攻進又分兵往克寧河賊勢不支遂直抵河州城圍立解山是西寧一帶得以次爲進  
兵是役也以二十餘日轉戰而前地既早寒又時方大雪河橋既毀乃以皮筏濟師主客既分形勢又隔  
卒能以少擊衆以逸待勞使賊退無所容進無所得實非諸將士之力不及此也隨案各員既蒙 恩優  
獎其餘員弁兵勇未便沒其微勞據各營開送前來奴才覆加查核委無冒濫且實係異常出力詳開具  
清單恭呈 御覽下部議奏○壬辰華輝奏自各國通商以來每歲出洋之銀爲數甚鉅近更通行內地  
小民生計日益艱難而戶部出款歲增數千餘萬內外臣工紛紛建議暫曰清逋賦也敷溢金也加捐稅  
也皆取財之法也天下之財止有此數取之過度民力不足以供之則亂端起矣有變而爲節財之說者  
則曰裁額兵也除中飽也汰浮費也有變而爲通財之說者則曰興工作也振商務也修鐵路也設銀行  
也此一說者固較勝矣而本原則不在是夫國用何出出於民民財何出出於地地利何出出於物工作

之成成此也商務之通通此也輪舟鐵路之運運此也故董勸農桑講求物產爲百聖王生財之大道卽今日養民致富之真源也民力有所不足必須官爲補助者可分爲二大端一曰廣種植一曰興水利謹縷析爲我 皇上陳之自兵燹以來蒼蒼樹木芟伐殆盡地之腴者忽瘠民之富者忽貧蓋果品材木足以供生人食用者其利視五穀爲尤豐所謂一年之計樹穀十年之計樹木也乃上下因循不知栽培愛護往往山童壤赤一望荒涼小民亦茶色流離無復承平景象則官吏之玩視民瘼也亦已久矣夫種植之大利其在南方者二曰桑曰茶黃河以南之省分近水者無不宜桑近山者無不宜茶苟能由官籌款購買桑秧茶子散給民間並講求養蠶製茗之方不數年而風行海內矣其在北方者二曰葡萄曰棉花黃河以北之省分天寒地燥惟此爲宜葡萄可釀酒棉花可紡織織布苟能博求良法勸導民間則餘利豐盈偶有水旱偏災無虞凍餒矣此四事者辦有成效立可行銷外洋自收利權然地方官吏必將畏難苟安誘於土性之不宜也民情之不順也天下無論何土必有相宜之處無論何樹必有可收之利此則南北各省皆有之皆宜之無所容其欺飾者也今請定一勸民種植之法民間有能於樹有樹木外種樹至五萬株十萬株以上者官爲酌給獎賞以示鼓勵並請定一戕害樹木之禁有無故戕害樹木一株者貧民罰種兩株富民罰種錢千文以充公用中國膏腴既廣寒暑適平他日百產餘盈闢一分利源卽增

一分稅課天下尙憂貧乏哉生財之道在廣種植者一也中國水利惟江南各省最爲講求自髮捻搆亂以來畿日河渠亦多湮塞民既無力修復官亦置若罔聞而於山僻省分及北方高燥中原寥廓之區則地方各官直不知水利爲何事惟日持三尺法以催比征徭而已甘肅陝西等省田地尤多荒廢水利之不修河患所由日亟也興修水利古今中外其法頗多約而舉之厥有八事一曰引泉兩山之間必有一川建堰引泉咸資利賴然一人之力不能兼顧或須董以官紳乃可以集費鳩工肇興大利此爲牧令者於境內泉源必應確知其數而詳求其用也二曰築塘泉源之大者開渠以引之其細者必築塘以蓄之可斷山間高地築塘宜開派公正紳耆專司啟閉需水者稍納公費爲購地修塘開之實所謂民財民用耳三曰開渠無論江河溪澗相度高下於其上流開渠以引之必須畎澮距川有經有緯旱收其利而水不爲災方爲盡善四曰通潮沿海之區鹵地爲多日及雨淋鹵去則草木繁昌遂成沃壤此等海濱漲地廣漠無垠築之則可惜亟宜招民墾闢廣開港汊通引海潮數月之間即可種植興地利養閭民增稅額一舉而數善備焉五曰開井丁寶楨爲山東巡撫教民開井汲泉以資灌溉民食其利今外洋開井機器每副僅數百金價值一省購數機則高地居民永免旱暵之患惟開井必擇有樹之地庶用力少而成功多六曰蓄水北方溪澗無多亦有雨水惟南人知蓄水北人不知蓄水耳誠就低窪之地深濬爲湖掘出

之土培堤種樹洶寬至十丈以上水深至五尺以上日光不能消燥可積至二月不乾七日用車枯糞汲水之法工拙而事勞惟南方龍骨車可汲水至十餘丈彷彿置多副備寬熟手分教北人事半功倍即可汲河水以溉田西人柳條各車近今益加修備並宜擇管而從以興水利而滅水患八曰填石西人近得新法每田十畝四圍掘一深溝寬一二丈深三四尺填以碎石高出地面石能汲水雨潦則泥濘皆乾石能含水久旱則土膏脈潤亦西法可採之一端也斯八事者有水可引之處固可因地勢以暢其流無水可引之處亦可藉人力以收其用此生財之道在興水利者又一也夫鄉曲細民終歲勤動農田所入究有幾何而額賦科徭急於星火地方官吏又復視同膜外不能盡養成全比年各省偏災官賑民捐助逾百萬而飢寒疾苦顛連溝壑者仍不可計算皆由地方官吏不能先事預防也且水利之興種植相因功用亦相濟而成嘉樹密林既能引泉致雨可免旱災而根蟠土中葉蓋地面當大雨時行高處泥沙不致隨流而下凡壅壓田畝淤塞河流之患亦可減輕誠能以種植為經以水利為緯以水利為體以種植為用行之十年而地利不日興民生不日富國計不日豐者未之有也或猶以為迂天下安有更捷於是者否則雖有工作其如無物可製何雖有輪舟鐵路其如無貨可運何此又各國通商以來濟變之良謀救時之要策而不可一日緩者也應請 皇上明發諭旨責成各省督撫特飭州縣各官將種植水利

兩端就臣摺內所已言者因地制宜認真興辦所未言者亦實心實力漸次擴充果其實政及民卓著成效臚陳事實送部引 見優予升階功效稍次者酌量保獎其藉端擾民奉行故事者立行多撤仍請飭下吏部戶部妥議考核章程通行各省三年大計將此二端歸入考成庶幾積習頹風一時不覺改不乘於地宮可藏於民由是振興工作開闢商途出中華不滿之源易外國無窮之利雖各省通商亦復何患之有是爲生財大道本原中之本原也 上諭御史魏煇奏請求種植水利以開利源一摺著該部議奏○是月俄羅斯國使臣喀希尼回國參贊巴布羅福署理○比利時國新簡駐華使臣費柯抵任

臣朱壽朋敬編

臣潘鴻鼎恭校

九月癸巳朔

上幸頤和園詰

慈福端佑康頤昭豫莊誠壽恭欽獻崇熙皇太后前請安駐蹕○諭軍

機大臣等前據鹿傳霖奏進攻瞻對即可得手何以連旬未據續報至瞻對番官本日請欽奏到業已照

准此與軍務兩不相妨即瞻境邊平亦當有番官撫輯也○總理各國事務衙門奏光緒二十二年六月

十二日准軍機處鈔交御史潘慶瀾奏民教不能相安亟宜設法消弭一摺臣奉 諭旨著該衙門詳奏

欽此欽遵到 臣衙門據原奏內稱無業莠民藉入教為護符一有爭訟地方官勢須扶教抑民良民積憤

填胸教案疊出欲弭其患在斷獄之得其平在洋人之不袒庇應由總理衙門與各國駐使會晤時曉以

情理無令干預訟事等語該御史所述民教相仇之根地方官辦理民教案之難可云透闢 臣等查教

士不得干預公私各事載在條約及咸豐十一年奏准傳教諭單各該地方官於交涉教務者務須查明

根由持平辦理又同治五年議准教士除教務外不得干預一切公私事件又光緒十二年議准凡奉教

人遇有訟事悉聽地方官審斷教士不得干預各等因歷經奏明有案 臣衙門凡遇各省民教之案於會

晤該使臣時無非申明尊章力與辨論勸其不必袒庇藉以保全教民與該御史所稱從容諭告聽以利  
害之言久已不謀而合本年廣東潮州古溪一案法美兩教互控而皆為華民該兩國使臣咸允照向章  
由地方官辦理等復要以教士領事均不干預該使臣均無異辭此案現經辦結至如教民犯案與教  
堂無關者總應由地方官自行核辦無如各省地方官辦理此等案件非過於拘牽致彼屬有所藉口卽  
苟為遷就使平民無辜負屈加以毆殺奸胥不問原被曲直有求不遂盡取償於事內之平民於是彼此  
相形道路側目其弱者相率而入教其強者相率而攻教矣該御史所稱欲弭其患在斷獄得其平誠非  
無見凡遇此等案件地方官平情酌理不背約以生事不違例以枉人所裨不小至所稱嚴拿地棍一節  
卽不因民教相仇地方官亦有應辦之責均應如該御史所奏請 旨飭下各直省將軍督撫轉飭各該  
地方官遇有民教爭訟但論是非不分民教持平審斷又嚴禁胥役騷擾事內平民庶幾民隱可通法令  
可行隱患亦可漸弭矣原奏又稱同文館肄業學生尤宜兼習公法及各國條例一二年後派令出洋差  
竣列保發往各省廠局審理民教案件如能持平辦理卽於民教事繁之區酌量補用等語 臣等查 臣衙  
門同文館肄業各生向係由精通外國語言文字後兼習公法律例該生等賦質不同成就匪易各國公  
法律例亦非暫行涉獵便能融會貫通然此皆中外交涉極要之學 臣等自當隨時督課以收實效至於

派令出洋 臣衙門業於本年五月查照上年十二月奏案揀派十六人分赴英法俄德各國藉資歷練俟各該生年滿差旋視其所造果能精熟律例公法亦可於列保時聲明發往各省量才試用似於教案不無裨益得 旨如所議行○甲午 上還宮○江甯布政使瑞璋緣事革職○乙未以松壽爲江甯布政使張紹華爲江西按察使○丙申予故大學士福銀祭葬入祀賢良祠○諭吏部奏遵議處分一摺開缺奉天東邊道張錫鑾著照部議卽行革職所有該革員侵吞稅務欸項著依克唐阿查明實在數目嚴行勒追○丁酉賞給五城及崇善堂等處粥廠暖廠米石○鹿傳霖電致總理各國事務衙門電綫不通旬日九月朔始奏有電 諭贍對番官訥欽奏到業已照准等語欽奉之下惶悚莫名查贍對本係川屬從前賞給遠賴原一時極宜之計况贍對今日之得失實關川省之安危前經迭次奏明擬請收回贍地改設流官昨復電奏 旨俟訥欽奏到當論以從緩欽此諒將贍對在所必爭且可懾服遠賴界務或易辦理情形由驛馳奏計尙未到且贍民懷然踴躍不啻出水火而登衽席今若再派番官管理不惟贍民仍受其害土司悉爲所脅將來川省直無門戶可守所關甚重至攻勦瞻果地遠礪堅又因擊退賊援以致月餘尙未得手迭次軍報動逾旬日昨亦詳細奏陳一面嚴飭周萬順刻日攻下並添派四營前往以期必克今欽奉 諭旨准派番官若新番官一到卽不使用兵是使贍民失望土司離心此時之損威猶



淺日後之貽患實深。具有天良不敢畏難苟安力圖保川之計是以迭次奏請收回贖地改設流官合再披瀝血忱不避斧鉞仰懇 聖明鑒察仍照前 旨緩派番官俟贖對攻克改設漢官撫輯如蒙 俞允俟訥欽批撥驛遞過川時准由臣拆收恭繳得以保川圖藏大局幸甚敬祈代奏奏入軍機大臣奉旨鹿傳霖電悉贖對事該督之意欲藉此收回使達賴懾伏朝廷之意正恐達賴不能懾伏轉致激動藏番騷擾以外向此事消息毫無千里該督亦當深思此時軍務總以能否得手為斷果能得手則雖有新設番官何難從長佈置若不得手刻雖不設番官於事奚補該督惟當督飭將士迅拔番衆以安邊圉至准放番官已有明降諭旨所請繳回批摺之處著毋庸議○延茂奏吉林機器局之設創始於光緒七年迄今十有六年而在局任事最久者為現任督辦三姓礦務之道員宋春澂奴才前任奉天學政時兩次按試吉林即聞該局侈口鋪張虛糜特甚第以事無實據未使作出位之思方今時事艱難正臣子痛心疾首之日迺過蒙 天恩極守斯土凡有利之可興弊之可去皆分內應辦之事萬不敢存五日京兆之心該局自創設以來衣鉢相傳半不可破動輒藉口於款項之不足賠累之太甚工匠之跋扈轉運之艱難局員方挾以為重官長竟無可如何此等壞習原不始於吉林而近日吉林之風氣已駭駭乎有城中高聳四方一尺之勢奴才自本年六月初八日接任先後接准前將軍長順咨開吉林機器局收支各款每

歷交接時向歸截日報銷以清欸目本將軍於六月初三日陳明光緒二十二年五月底止以前所有該局收支欸項歸長順造冊報銷自六月初一日起以後支需欸目由延茂造報並飭該局將五月底以前不敷經費銀兩及庫儲各項料件各數目開具清單咨送前來奴才查該局清摺內開不敷庫平銀四萬四千餘兩又庫儲料件摺內有紫銅十萬零六千餘斤伏思此項不敷銀兩及所儲料件既經前將軍長順奏明將來由奴才造冊報銷則銀欸之因何不敷料件之是否符合自應速欸查明以符奏案且奴才與前將軍長順訂交數十年素知其人性仁慈待人未免過厚而該局又巧詐跋扈無人不受其欺是以將該局之總辦遠桂等暫行撤差另委此次奏調之內閣中書容賢接辦並撥分巡道聯陔親歷該局逐欸清查去後查前將軍長順轉據該局開列交代各項料件清摺內有各色紫銅一項十萬六千餘斤道經盤查過稱庫存實有三萬六千餘斤而該局即趁此清查亦報為三萬六千餘斤反謂初報長順之十萬六千餘斤為差誤後經查庫房收發流水各簿截至將軍被期交代之日止應存紫銅四萬三千餘斤道經盤查並取其管庫司事甘結經分巡道聯陔中書容賢申報前來奴才復查該局歷年以來弊混欺蒙已成錮習即紫銅一項三面考證全不相符然則前次所報十萬六千之數謂非欺蒙長順而何且據該局聲稱並未備文申報是以未經存案夫歷任交代全以案牘為憑今該局於申報交代要件並不立

案是其輩混情弊已屬顯然相應請 旨將撤差之機器局前總辦記名副都統花翎協領逸桂五品藍

翎分省補用州同魏春寅先行交部議處交吉林分巡道聯陔逐款清查分別研訊如有別項情弊再

行從嚴參辦以儆將來而重公款得 旨如所請行○戊戌諭御史鄭思賢奏廢生主事補缺章程請酌

量變通一摺著吏部議奏○己亥 上幸頤和園詣 慈福端佑康頤昭豫莊誠壽恭欽獻崇熙皇太后

前請安駐蹕○賞給普濟堂等處粥廠暖廠米石○庚子諭本日李鴻藻病痊銷假召對時見其氣體尙

未復元著賞假一箇月安心調理○辛丑 上詣覺香寺拈香○還頤和園○癸卯祭 歷代帝王廟遣

魁斌行禮○召桂斌回京調運順為庫倫辦事大臣賞寶昌副都統銜作為科布多參贊大臣○諭依克

唐阿奏署城守尉貪婪不職據實參辦一摺著復州城守尉候補協領佐領成春任用劣吏句通領僅等

遇事賄囑情託侵吞倉米勒罰良民經依克唐阿派員查明均有確據成春著卽行革職並著查明倉庫

各款如有虧短嚴行懲究餘著照所議辦理○甲辰 上還宮○乙巳諭陳寶箴奏查明知府信用劣紳

舉動乖謬請旨懲處一摺已革湖南常德府知府文杰在任多年隱比匪人聲名萬劣著卽行革職永不

敘用同知職銜吳愛亭卽吳金榮交結官長多招物議著革去職銜交地方官嚴加管束○總理各國事

務衙門奏 旨衙門於九月初五日日本使臣林董來署會晤據稱馬關約准新開蘇杭沙市重慶四口租

界應照向章辦理自中國自行船章程日本又不得專界專管及威海衛山東駐兵之地均與馬關約不符商催逾年各省迄不遵守至所定機器製造稅日本可以照辦惟須增開津滬廈漢四口租界以相抵償當即面遞節略次日復來照會將所擬文憑底稿送閱等以內河行船略見於現訂商約中國所定者係滬蘇杭關章按照設法防弊之條辦理不係爲日本一國而設該使無可強辯乃不請撤回關章惟以不遵馬關約與之定議爲言力請另議未定議之前暫照長江章程辦理至蘇杭內地租界與沿江沿海不同各省均以自設巡捕爲宜不願日人專界專管衙門與蘇浙鄂三省往返電商均無妥籌辦法威海駐兵東省意在進款衙門亦經電商屢矣現該使臣堅謂表國家訓條馬關約本意如此期於必辦否則新約即行停換等語與辯論并准裕庚電述該國外部之言日本政府更換後林董惟命之是聽非復前此和商頃十一日竟以照會來稱允否以明日子時爲定等語查馬關約准開四口本有均照向開海口及內地鎮市章程辦理之言我欲以甯波辦法爲程彼欲以上海章程爲法使外商於因應尙不難就範無如蘇省初與領事荒川原訂六款日政府駁之續與珍田商議久而未定遂貽日本尋釁之端杭界漸有規模沙市現正商論重慶似定非定均難會馬關約別開生面者也至機器製造稅關係甚重林董議定新約必別開另議衙門因有值百抽十之奏日本知中國志在必行故允相讓而別

求抵換利益亦可援一體均沾爲說現各該口通商已久別國均有租界原難獨拒日本我雖全許最致力亦尙不能同開此次新約定議日本武臣議士以未得格外利益類多不滿林董之詞林董來密自謂政府責其顛覆撤調回國刻當外部人意見存反獲利害之間不能不略極輕重相應請旨飭下南洋大臣湖廣總督四川總督山東江蘇浙江各巡撫遵照馬關條約飭屬奉行毋令啟釁一面由臣衙門再與林董晤訂互立文憑字句之間詳慎斟酌期紓近患而免疏虞得旨如所議行 公立文憑 第一款

添設通商口岸專爲日本商民安定租界管理道路以及稽查地面之權專屬該國領事 第二款

光緒二十八年八月初三日江海關所頒示之洋商蘇杭滬三處通商試辦章程內其係輪船以及僱用白置船隻之事當與日本妥商而定未經商定之前務依長江章程照行 第三款 日本政府允中國

政府任便酌量課機器製造貨物稅餉但其稅餉不得比中國臣民所納加多或有殊異中國政府亦允一經日本政府咨請即在上海天津廈門漢口等處設日本專管租界 第四款 電達山東巡撫九

日本軍隊駐守區之劃界日本里法五里約合中國四十里以內中國軍隊不宜逼近或紮駐以符條約爲此公立文憑須至文憑者○丙午諭軍機大臣等有人奏知縣賈酷異常民不堪命請旨查辦一摺據稱直隸豐寧縣知縣徐體馨創造非刑因案苛罰尋常詞訟押人至百餘名並有勒捐商民縱差滋擾等

情著薛蔭按照所參各節確切查明據實具奏毋稍徇隱原摺著鈔給閱看將此諭令知之○諭王文韶  
張之洞陳陳鐵路辦理事宜請設立鐵路總公司保薦盛宣懷督辦等語直隸津海關道盛宣懷著開缺  
以四品京堂候補督辦鐵路總公司事務○丁未 上御文華殿德使臣海靖比國使臣費萬觀見○  
予大學士張之萬致仕仍賞食全俸○鹿傳霖奏提督周萬順統率各營進剿曠對迭克險隘已抵墨科  
進攻曠巢情形業經臣等會奏在案自章谷擊走仔仲後曠民陸續來投者已千餘家道大軍已抵墨科  
三曠百姓紛紛赴營投誠約五千餘家均各溫言安慰據稱其頭人多被番官禁錮寨中該處距中曠老  
果僅一日程該逆番聞大軍已至高敢負隅抗拒絕無悔罪之心臣等當飭周萬順妥籌進兵以期速克  
據周萬順先後稟報曠巢之前有雅龍江一水相隔左路向有大橋早被拆毀右路相距百里雅龍江上  
游有撥日橋一道未拆可以進兵急於六月二十八日先派土司馬隊晝夜馳往搶護一面妥籌進攻之  
策嚴防窺逸之路隨分派三哨由右路渡橋在江奪巴公地方扼紮復派兩哨由左路進直抵雅龍江岸  
屯紮多伐樹木預備修補大橋並紮木筏以便大軍全渡合圍又剴德爾格忒土司調集千人嚴防由上  
曠對通藏之路并飭襄塘守備李朝福調集土兵由下曠對取道擇要嚴防復派隨員把總馬紹麟帶勇  
四十名前往協同李朝福防守又飭明正土百戶帶兵數十名督同已降之曠民馬隊二百騎扼守麻惹

地方以防各處總隘布置已定初二日新建營帶鄧明慶行抵播日溝賊騎千餘突出正欲與明正馬隊接仗爭橋見我軍繼至狂奔而退鄧明慶隨督飭漢土兵勇跟追十五里直抵江登巴公以賊騎已遠暫行收隊駐守以待大軍周萬順將後路布置周安即率大軍由墨科右路前進初十日抵物喜地方僅隔逆巢三里見碉寨林立防守甚固十一日周萬順親率都司曹懷甲出隊行至里許賊巢先燃大礮我軍散開隊伍一鼓直前鎗礮連環轟擊而寨牆甚堅擊中僅落浮土自寅至午我軍堅立不退傷亡勇丁四名轟斃悍賊十餘人帶傷者甚多周萬順即於前敵挖塹築壘飛傳各營漸次移軍合圍晝夜猛攻惟老巢之左有大石礮一座地勢扼要最為堅固十二日周萬順督令用礮轟擊石礮打穿十餘眼礮內受傷者數十人餘皆躲入地窖午後各軍復移近里許豎立木城由新建長勝中兩營挑選勇丁四十名各備噴筒火彈鉛械並鋤井帶樹枝夜半潛往倚礮壘木以避礮石下藏勇丁挖其牆脚周萬順督領甲各帶鎗隊百名相隨應援礮內聞聲驚覺亂石下擊周萬順等放鎗轟擊立斃數賊餘始退避維時各寨賊兵聞警齊起鎗聲不絕周萬順等分投迎敵自十三日子初起肉薄夜戰直至寅初我軍隨身藥彈將罄幸礮礮業已挖通急燃火彈打入火光閃處見礮石堆積茅柴遂連放火彈引燃柴草賊始覺潰大已黎明我軍奪獲逆礮徐徐收隊是役也燒斃番賊以百數計我軍差弁勇丁陣亡者六名受傷者二十四名

現已破此堅壘賊勢更形窮蹙投誠贖目名麥巴七工者貽番番舉勸降該番習番語多狂悖誓以死守二十四日運到開花礮兩尊周萬順繞至逆巢後山查看並詢知道番住屋樓有九層其最高一層尙露軒窗當以開花礮向窗隙轟入旋聞號泣雜沓之聲連轟十數礮人聲漸寂似係全避於下層且賊寨尙多兵力單薄開花礮僅五磅彈子尙覺力小以致連日進攻尙未得手至逆番仔仲則忠扎勸自礮料敗竄後探實未回勝果已赴工曲乍丁等處意圖搬兵回援二十八日探報賊數百人已有傳牌至峒隴地方勢將回援中贖周萬順聞信卽於所部四營各挑選番勇六十名派參將李飛龍帶往擇要堵擊是夜微雨三鼓突聞賊寨各寨喊聲四起鎗礮雷鳴周萬順與曹懷甲正在登陴巡警嚴飭各營堅守營壘靜以待之四更後賊寨齊燃燈籠隊出礮外見對面右山三峒有賊出敵相持天明我軍哨官楊蔭棠至逆寨後山點放開花大礮炸彈正落賊叢賊眾始狂奔入寨是夜三鼓賊番百餘人亦同時猛撲李章營壘相持一時之久不退守備吳利南番勇抵禦立時中鎗陣亡兵勇受傷者亦數人維時鄧明慶勿友順議攻其右山三峒冀可得手卽共挑番勇百餘名帶同差弁張明禮趙純緞議定鄧明慶攻撲上甲兩礮易友順攻其下礮直逼牆下一齊挖洞守礮之賊大聲疾呼礮石下擊各賊寨均同聲舉火明如白晝其攻撲李章營壘之賊亦回顧救援我軍列陣右山挖者自挖戰者自戰黎明時上礮已穿遂連拋火彈礮



已引燃其上層注水下澆救火力禦我軍復速放開花砲斃賊十餘人賊始奔退當斬獲首級四顆傷亡不知其數查點我軍亦陣亡六名受傷者二十名維時李飛龍已率各營奮勇前赴嚶隴防禦援賊至勞五科地方李飛龍隨營飭襄塘土兵及熊隴降番與明正白戶頭人等於嚶隴所屬喇峽地方妥為布置初七日探知賊騎將來卽於該處擇險扼紮申酉之交援賊大至嚶隴瓦述土司百姓亦助兵三百名分紮左右山梁遙見賊來已近燃礮為號李飛龍卽督隊衝下山與賊相持轟擊傷賊無算賊眾勢感反奔我軍追逐十餘里天晚未敢窮追始行收隊擬俟黎明仍復追擊倘能盡殲援賊更足以寒番衆之膽速成捕穴之功各等情前來等查此次逆番於大軍攻抵逆巢四面圍逼勢已窮感尙敢倔强不服負隅死拒諭降不聽尤敢乘夜猛撲營壘連招援兵實屬異常頑梗現在我軍業已殲其堅礮破走援賊雖老巢未卽速拔已成釜底游魂惟賊志甚逆已久布置極爲周密恃其地險礮堅牆厚樓高以暗擊明最爲得勢故雖已合圍一時猝難得手且關外地方遼闊險峻我軍之後路運道最關緊要節節均須分隊駐紮嚴防周萬順所部現僅四營已覺分佈難週現又防勦援賊儲多力分更形單薄關外早寒誠恐賊時師老急難攻克卽等現復添派壽字前營長勝副中營暨泰安中左兩營飭令迅速拔隊先後出關隨同周萬順助勦以厚兵力至泰安中左營向歸丁疊知縣張繼統帶在附省一帶緝匪彈壓威信素孚

近因地方漸安張繼於六月請咨回籍守制刻值用人之際一面札調張繼飭其喪葬事畢星馳回川仍統各營助剿以資得力且此後瞻對攻克收回與朱高章各兩土司地方善後事宜尤須有得力之員妥爲辦理該員才識明決頗知權變擬卽派令一併經理以期周妥等仍催令各軍迅速出關督飭周萬順速籌攻堅之策俾得早告成功上紓宸座又奏並茶森電傳諭旨鹿傳霖電悉瞻對用兵係暫時辦法事定之後應否仍設番官當再斟酌妥辦欽尙未奉到俟奏到當諭以從緩再辦不能因此廢竇喇嘛轉生他衅也藏事棘手該督等當通盤籌計切勿鹵莽並論文海知之欽此跪誦之下仰見聖主慎重邊陲之至意臣待罪川疆稔知藏事岌岌詳探熟籌思爲安內防外之策曷敢鹵莽從事致肇衅端竊以瞻對爲川省藩籬其地本係川屬土司去藏遠而距川近惟處各土司之中當年曠國叛亂川藏會剿藏兵先克精索兵費三十萬維時款項無出前督臣奏請賞給達賴原一時權宜之計乃自派番官管理之後暴虐異常膽民不堪其苦光緒十五年結起叛遂番官懇求內附彼時又未乘勢收回仍由藏改派番官并添一堪布番兵八百名以致愈肆強橫瞻民更遭荼毒而且威脅各土司數年以來巴裏塘及霍爾瓦述等十餘土司皆以川省威令不行相率依附瞻對該番日益驕恣直欲各土司盡歸所轄故連年侵佔明正土地葺衅搆兵今更因朱高章各土司爭要朱高投之竟敢糾眾赴寧谷勒令投彼不遵

委員開導先開兵端此皆積久生玩之所致也。前迭次陳奏業經詳細聲明先後奉旨遵辦在案。初

意尙謂該番或可理諭先將土司與案斷結再行設法招撫。瞻民使之內亂而乘勢取回瞻地。今天奪其魄該番竟敢抗拒官兵情同叛逆自應及時聲罪致討使瞻民早歸內屬。固我疆圉。此次大兵所至瞻民紛紛效順大有舉食鹽漿以迎王師氣象。即各土司亦均震懾軍威各率土兵應調前來助勦。及此天時民心交順之會改設漢官妥為撫綏內可以安各土司向化之心外可以奪藏番藐抗之氣。卽藏中一旦有事此地已歸川屬亦有門戶可守。況瞻對地素產金該番不知開採惟勒令土民掇淘貢獻。歲得之金已約值銀二萬有餘。除自供支外每歲輸之遠賴者約銀萬餘兩。我得其地設法開採計足供改設官制一切經費不待另籌且冀辦理豐旺可助餉需。若失今不取而仍派番官不惟自失地利莫固藩籬且使瞻民重遭塗炭各土司咸懷異心甚非。皇上懷保小民慎固邊陲之至意。是今日瞻對關繫甚重在所必爭。現復先後添派四營陸續前往應援期於必克。想負嶠小醜當可指日驅除。至藏事之棘手實由遠賴之頑抗。惟其有藐視漢官違背朝廷之心故敢出此。今收回瞻地以示薄懲或可稍知儆惕。且探聞遠賴近日情形狂悖實有叛親離之勢。班禪既與之水火而乍丁之呼圖克圖亦有怨言。今復有察木多呼圖克圖與其所轄喇嘛齟齬聚眾互鬪之事。是藏中之內亂已萌。藏木我之屬地我若自行整頓

使之畏威聽命則界務或易了結外人自無辭干預若不使之稍知畏懼致釁界始終梗阻英人必藉詞生事彼又將連結俄人以爲援則藏之危亡可立而待藏亡若膽對屬藏亦卽與之俱亡而川省虛無門戶可守其何能支此臣所以日夜圖維而以早收贖對爲固川之計卽爲屬藏之機謀藏番之伎倆又值人心解體之時不奪贖對彼并不知恩卽奪贖對彼亦不能抗論我之兵力禦他人則不足制藏番則有餘且贖對本係內屬藏番前有功則賞之今有罪則奪之益足昭朝廷賞罰之大公縱違賴饒舌亦不能大肆鳴張不足爲慮似并可使知畏懼界務或易就範圍蓋畏威不愾德是其本性今之愚頑抗執恐非一味勸導所能聽從也臣與駐藏大臣文海再四籌商意見相同理合據實陳明竊懇 聖明獨斷敕下駐藏大臣不准再派番官定於收回贖地改設流官以順民心安土司而固邊圉川省幸甚大局幸甚 上諭軍機大臣等鹿傳霖奏進兵圍攻中瞻番業疊次擊敗援賊一摺官軍圍逼中瞻該夷番尙敢負隅抗拒乘夜撲營現雖迭次接仗稍有擒斬而堅壁仍未攻破該督務當穩慎圖維不可視之太易著嚴飭先後派出各軍相機進剿以竟全功餘照所議辦理另摺奏統籌川藏情形贖對亟宜改設漢官等語該督所籌辦法自屬慮遠思深但此事總以軍務能否得手爲斷初四日電旨業已詳悉諭知如果軍事得手將來設官一節尙可斟酌辦理此時正不必因番官已放或慮有所牽掣也將此由四百里諭令

知之○中俄新約成其文曰 大清國 大皇帝前於中日肇釁之後因蒙大俄羅斯國大皇帝仗義各節並願將兩國邊疆及通商等事於兩國互有益者商定妥協以固格外和好是以特派 大清國 欽命督辦軍務處王大臣爲全權大臣會同大俄羅斯國大皇帝欽差大臣出使中國全權大臣一等伯爵寶在北京定將中國之東三省火車道接連俄國西卑里亞省之火車道以冀兩國通商來往迅速沿海邊防堅固並議專條以答代索遼東等處之義 一近因俄國西卑里亞火車道竣工在卽中國允准俄國將該火車道一由俄國海參崴畢續造至中國吉林琿春城又向西北續至吉林省城止一由俄國境之西卑里亞火車站續造至中國黑龍江之愛琿城向西南至齊齊哈爾省城又至吉林伯都訥地方又向東南續造至吉林省城止 二凡續造進中國境內黑龍江及吉林各火車道均由俄國自行備辦資本其車道一切章程亦均仿俄國火車條程中國不得與聞至其管理之權亦暫行均歸俄國以三十年爲期過期後准由中國籌備資本估價將該火車道並一切火車機器廠房屋等產贖回惟如何贖法容後再行妥議 三中國現有火車道擬自山海關續造至奉天盛京城由盛京接續至吉林倘中國日後有不便卽時造此鐵路者准由俄國備資由吉林城代造以十年爲期贖回至鐵路應由何路起造均照中國已勘定之道接續至盛京並牛莊等處地方止 四中國所擬續造之火車道自奉天山海關至牛

莊至蓋平至金州至旅順口以及至大連灣等處地方均應仿俄國火車道以期中俄彼此來往通商之便 五以上俄國自造之火車道所經各地方中國文武官員不能隨時保護周詳應准俄國專派馬步營兵數隊駐紮各要站以期妥護商務 六自造成各火車道後兩國彼此運進之貨其納稅章程均準同治元年二月初四日中俄陸路通商條約完納 七黑龍江及吉林長白山等處地方所產五金之礦向有禁例不准開挖自此約定後准俄國以及本國商民隨時開採惟須先行稟報中國地方官具領護照并按中國內地礦務條程方准開挖 八東三省雖有練軍惟大半軍營係仍照古制辦理倘日後中國欲將各省全行改仿西法惟向俄國借請熟悉營務之武員來中國整頓一切其章程則與兩省所請德國武員條程辦理無異 九俄國在亞細亞洲無周年不凍之海口一時該洲若有軍務俄國東海以及太平洋水師諸多不便不得隨時駛行今中國因鑒於此是以情願將山東省之膠州地方暫行租與俄國以十五年為限其俄國所造之營房棧房機器船塢等類准中國於期滿後估價備資購入但如無軍務之危俄國不得即時屯兵據要以免他國嫌疑黃租之款應如何辦理日後另有附條酌議 十遼東之旅順口以及大連灣等處地方原係險要之區中國極應速為整頓各事以及修理各砲臺等諸要務以備不虞既立此約則俄國允准將此二處相為保護不准他國侵犯中國亦允准將來永不讓

與他國占踞惟日後俄國忽有軍務中國准將旅順口及大連灣等處地方暫行讓與俄國水陸軍營泊屯於此以期俄軍攻守之便 十一旅順口大連灣等處地方若俄國無軍務之危則中國自行管理與俄國無涉惟東三省火車道以及開挖五金礦諸務准於換約後即行便宜施行俄國文武官員以及商民人等所到之處中國官員理應格外優待保護不得阻滯其游歷各處地方 十二此約奉兩國御筆批准後各將條約照行除旅順口大連灣及膠州諸款外全行曉諭各地方官遵照將來換約應在何處再行酌議自畫押之日始以六箇月為期兩國全權大臣議定此約備漢文俄文法文約本各兩分畫押蓋印為憑三國文字校對無訛遇有講論以法文為準○戊申 上幸頤和園詣 慈福端佑康頤昭豫莊誠壽恭欽獻崇熙皇太后前請安駐蹕○己酉 上還宮○諭前據御史蔣式芬奏參直隸定州知州徐慶銓貪劣各款當經諭令王文韶確查具奏茲據奏稱徐慶銓被參各款查無實據惟憤懣才庸不能約束家丁捕治盜賊難勝繁要之任定州直隸州知州徐慶銓著以通判降補用示懲誡○庚戌命大學士李鴻章在總理各國事務衙門行走○以照敬署步軍統領○諭本月十五日李鴻章擅入圓明園禁地游覽殊於體制不合著交部議處○諭步軍統領衙門奏本月十五日吏部左侍郎徐用儀由前門棋盤街地方經過突有已革馬甲林光施放火鎗將該侍郎車上玻璃打破以致面有微傷當將兇犯拿

獲審訊供詞支離請飭送部嚴訊等語已革馬甲林光膽敢在鞏蔽之下施放火鎗轟擊大員不法已極  
當即將該犯林光送交刑部嚴加審訊加等治罪並著正黃旗滿洲都統飭將該犯所供之領催扎姓嚴  
行看管候刑部傳訊○乙卯 上諭瀛秀圖門恭迎 慈禧端佑康頤昭豫莊誠壽恭欽獻崇熙皇太  
后還宮○丙辰以任道銜爲河東河道總督○諭吏部奏選該處分一摺大學士李鴻章摺入圓明園游  
覽應得革職處分著加恩改爲罰俸一年○丁巳諭軍機大臣等文海奏行抵打箭爐詢問瞻對情形一  
摺文海著在打箭爐暫駐所帶勇丁毋庸遣撤俟川藏道路疏通卽行進藏瞻對一事機經諭令鹿傳霖  
妥慎辦理不可視之太易現在節近冬令軍事是否得手轉瞬大雪封山必至進兵無路該督務須嚴飭  
在事各員迅拔堅巢毋任曠日持久轉致大局或有窒礙是爲至要仍將現在辦理情形隨時電聞將此  
由五百里各諭令知之○戊戌直隸書紳前山東布政使崇保尙書銜准重赴鹿鳴筵宴○盛宣懷奏自海  
防事起中外上下競言自強議論嘉謨日有獻納上年經日朝之費盡臣志士益慨然於強弱利鈍之故  
欲盡取歐洲之新法變易華夏之舊習 朝廷深維至計惟舉其大者遠者於是有創辦南北鐵路之役  
願臣以爲鐵路者所以速徵調通利源爲自強一端非幹路既成卽可坐而俟其強也泰西諸邦用舉國  
之才智以興農商工藝之利卽精舉國之商力以養水陸之兵保農工之業蓋國非兵不强必有精兵然



後可以應徵調則宜練兵兵非餉爲練必興商務然後可以擴利源則宜理財兵與財不得其人雖日言練日言理而終無可用之兵可恃之財則宜育才以噴蒙 召對略陳愚慮詞軍機大臣復奉 旨傳詢俾罄無遺測之微仰見 聖人兼聽並觀適言是察不揣愚昧謹以三事爲我 皇上條析陳之一曰練兵之要中國三代寓兵於農唐宋以降專用召募兵民久分各國皆然近年東西諸國兵制皆由募兵而復爲徵兵事變所趨中國豈獨能不然哉顧今日既糜餉千餘萬以養無用之練兵復糜餉千餘萬以養有用之練勇髮捻平定三十年所謂有用之勇一旦臨敵其僨事與練兵等方事之棘各路添募倉猝成軍卽所日觀多有不能持鎗施放者蓋募兵一事無賴亡命兼收並蓄來無所考其弊一少壯從軍衰老除汰去無所歸其弊二開營增募類驅市人不教謂棄其弊三事定遣散多爲盜賊遂貽民害其弊四近者議裁練營而減兵不能汰官議建洋操而餉重不能多練况勇餉與兵餉不同新勇與舊勇又各不同餉厚者不免相矜餉薄者自甘廢弛軍制愈紛餉力愈絀兵氣愈弱現除京營外各省實存練兵練勇八十餘萬人更新而不去焉無此財力制兵而不劃一非督治軍宜將天下畫分十鎮海疆邊疆爲重腹地僻地爲輕堅強樸實之地多徵膏沃柔脆之區少選參酌西法簡練新兵三十萬人就各鎮形勢輕重差等兵數多寡徵選戶籍可稽未經罪犯年在二十以上二十五以下體質身幹合格者錄爲常備兵

入營教練期以三年退爲徵備兵亦期三年退爲後備兵亦期三年退爲民兵期以五年除其兵籍自徵備兵以下平時在家服農有事以次徵集練備兵每年一次招集屯營與常備兵合操後備兵每年一次招集便宜地方使之演習皆視道理遠近給路費民兵不集操在籍者皆免本戶徭役每歲十月由各鎮揀派選兵官分赴各屬會同州縣驗選合格者註於籍隨時徵充常備壯者入營而老者退籍老者退而壯者又復入營歷三年而一兵之餉得二兵之用歷六年而一兵之餉得三兵之用九年以後歲額二十萬人之餉常得一百二十萬人之用兵皆土著游惰不錄其利一更遞進步室家可歸其利二事至徵召人皆練習其利三事畢歸農不流爲匪其利四各鎮營制餉章統歸一律各營鎗礮器械統歸一式舉練營勇營悉去之以其歲餉三千餘萬兩練常備兵三十萬人重訂餉章祇期核實不必過優歲約不逾二千萬兩其餘以備洋教習薪水糧備後備兵調操路費及酌留綠營之餉計無不足此事爲強弱關鍵雖加籌款項亦所應爲况餉練兵尤難滿緩但持之貴堅行之宜漸或每鎮先練三分之一練成後再行添練以足額爲止裁革綠營勇亦如之至綠營尙有城守防汛之責餉解犯等差或酌留若干屬於州縣若如各國警察巡捕之意而責成整飭之自無偏廢之虞應請 特簡知兵重臣會同兵部戶部查明兵數餉數並採取英德俄法美日諸國練兵之法決擇參酌釐定章程奏准施行承爲定制一曰理財

之要理財有二義開源節流盡之矣今之廣製造興礦政以開源也紗布各廠成本之重不足敵洋產五金各礦收效之速不足濟急需今之併局卡裁冗費以節流也減併者百一無裨國計之大節裁者錙銖何當中飽之巨言常用則歲出歲入不相抵言通商則輸出輸入不相抵言洋債則竭內外之力而更無以相抵欲求足國先無病民欲求商利在挽外溢加稅之議事未就緒聞西人以釐金為詞蓋窺我國用之經必不能停收釐金也應機決策莫若徑免天下中途釐金加關稅為值百抽十令彼無所藉口釐金既免即仿行西國印稅之法辦理得宜計加收之關稅新收之印稅合之當倍於釐金而免釐則出口土貨易於流通加稅則進口洋貨或稍清減取益防損利在無形所謂足國而不病民且險以挽外溢之利者此也西人聚舉國之財為通商惠工之本綜其樞紐皆在銀行中國亟宜仿辦毋任洋人銀行專我大利中國銀行既立使大信孚於商民泉府因通而不窮仿借國債可代洋債不受重惠之挾制不喫鑄價之虧折所謂挽外溢以足國者此其一也墨西哥國以九成之銀鑄錢運行中國易我十成之銀歲耗以億萬計近來中外臣工多議自鑄銀元旗東湖北北洋南洋先後鑄造分兩輕重悉准墨銀原以為國家圖法自古及今皆自為制度隨人趨步各國所無既不能廢兩為元各庫出入仍需元寶必致無銀可鑄查光緒十二年十月海軍衙門奏請將應放南北洋經費及東三省餉項均按二兩平核發是銅兩

改用京平已有成案今宜在京師特設銀元總局以廣東湖北天津上海爲分局開鑄銀幣每元重京平九成銀一兩再鑄金錢及小銀錢使子母相權而行凡出款俱用官鑄銀幣各省關收納地丁錢糧鹽課關稅釐金俱收官鑄銀幣元寶小錠概不準用惟收款仍照庫平十成銀計算庫平較京平定以每百兩加平六兩十成銀較九成銀每百兩應加色十兩除各庫上兌津貼銀一兩定以每百兩加色九兩如應交庫平足銀一百兩者實收銀幣一百十五元無輕重高下之別無減平扣色之弊易簡理得婦孺難欺每年度支八千餘萬戶部約可盈餘平色銀一千二百萬兩較向來各省撥解平餘多收當不下千萬所謂挽外溢以足國者又其一也此外商務鉅細萬端設施有序應請 特簡通達中外商務之大臣專司商政會同戶部取法鄰國實見施行興起商學鼓舞工藝利源無外溢藏富於商民君孰與不足國何患不强一曰育才之要西國人才之盛皆出於學堂然考其所爲學堂之等入學之年程課之序與夫農工商兵之莫不有學往往與曲臺之禮周官之著左氏公羊之傳管墨諸子之說相符蓋無人不學無事不教本三代學校之制特中國去古既遠淺成文具而泰西學堂闢合道妙立致富強益以見古聖人之道大用大效小用小效文軌雖殊而莫能外也近日刑部侍郎李端棻推廣學校一摺洞見本源當蒙採擇竊謂各府州縣驟難遍設學堂宜令各省先設省學堂一所教以天算地輿格致製造汽機礦冶諸學而

以法律政治商稅爲要先設武備學堂一所教以築壘測地鎗礮鑿造彈丸發送隊伍分合馬騎控御諸學而以兵律戎機有勇知方爲要在下之趨向全視在上之用舍同文館放方言館出洋學生糜費不少而得人不多文科之八股試帖武科之刀弓石不待督責而莫不致力其明證也今不能盡改科舉之制似宜專設一科裁天下之廣額爲新學之進階明定功令使文武學堂卒業者皆有出身之正途齊仕進於科第則開風興起學校如林人才自不可勝用應請 特開通知時務學行俱懋之大臣專司學政會同禮兵二部提挈綱領一新海內之觀聽有志之士不自奮於有用之學者未之有也以上二端參酌歐美致富致強之術實不外聖經足食足兵之謨舉而措之要在知人用人而已所慮拘牽舊制難以變動又或慨然於物窮則變意在振興而尤慮天下將撫心志不齊難以統籌全局恐年復一年外人耽耽視我一無足恃肆彼要求得步進步無兵則不能保守利權無餉則不能充養兵力二者互爲掣肘甚至洋債不能再借邊土不能自保至其時始悔七年之劫不若三年之艾殆已晚矣自古國家政事之張弛強弱之機括皆繫於君臣之謀慮一轉移間其效如見 惟國恥不可忘邦交不可恃伏願 皇上聖覽輒之在前濟宇宙之大勢發憤自強毅然 宸斷勿敷衍而畏難勿回惑於疑議王大臣等皆公忠體 國臥薪嘗膽同贊 聖謨國宮兵強達人自服此薄海臣庶所延頸企踵以俟之者也又委使命不辱專對

剛能自非學人莫任斯選現環球通商皇華載道泰西各國來華使臣類能尊主庇民克壯厥職雖憑藉國勢要其才行多有本原日本維新未久觀其來者亦往往接武西土中國遣使交鄰時值甘肅回文之館培植不爲不殷隨使之員固愚不爲不庸然猶不免有乏才之嘆昔何歟毋亦孔孟義理之學久植其本中外政法之故未通其大雖嫻然其語言文字僅同於小道可觀而不足以致遠也查上年在滬海關道任內籌款設立學堂招選生徒延訂華洋教習分教大算輿地格致製造汽機化磁諸學經直隸督臣王文韶奏明開辦本年春間又在上海捐購基地稟明兩江督臣劉坤一籌款議建南洋公學如津學之制而損益之俟籌款有緒再當陳奏綜厥課程收效皆在十年之後且諸生選自童幼未有一命之秩既不能變更科舉卽學業有成亦難驟膺顯擢予以要任相需方殷緩不濟急日本明治初元僑島馬關戰屢失利諸藩皆擇遺藩士翹楚厚其資裝就學外國今當路諸人率出於此擬請略取其意在京師及上海兩處各設一達成館取成材之士專學英法語言文字專課法律公法政治通商之學期以三平均有門徑已通大要請 命出使大臣奏調隨員悉取於兩館俟至外洋俾肄學於名師就試於大學歷練三年歸國之後內而總署章京外而各口關道使署參贊皆非是不得與冀望既著卽出使大臣總署大臣之選也其入館之法兩館各以三四十名爲額京官取翰林編檢六部司員外官取候補候選州縣以

上道府以下令京官四品以上外官三品以上各舉所知出具切實考語保送 特簡專使學政大臣考取分發京師上海兩館其常年經費延請洋教習及館舍膏獎書籍食用各項每年兩館約需銀十萬兩請由 臣在所管招商輪船電報兩局內捐解以仰報効其設館之地京師由專司學政大臣酌定上海附於南洋公學詳細章程俟奉 俞旨後由專司學政大臣核定奏咨照辦抑 臣更有陳者孔門以德爲首科西學以修身爲根本必先貞固乃爲幹事之材未有華士可當重遠之寄保送之人必以志操堅卓器識深穩爲指歸勿震聲華勿牽私故庶幾行己有恥可使四方此則內外諸 臣所共知而在 臣特爲懇懇過慮者也又奏銀行防於泰西其大旨流通一國之貨財以應上下之求給立法既善於中國之票號錢莊而國家任保護利權無旁撓故能維持不做各國通商以來華人不知務此英法德俄日本之銀行乃推行來華攘我大利近年中外士大夫灼見本末亦多建開設銀行之議商務樞機所繫現又舉辦鐵路造端宏大非急設中國銀行無以通華商之氣脉杜洋商之挾持誠者謂國家銀行當全發幣本簡界大官通行鈔票山部造發如英法等國財賦皆出入於銀行是戶部之外府也然中外風氣不同部鈔股鑾不違執官府之制度運貿易之經綸恐繁礙滋多流弊斯集或致委重西人取資洋款數千萬金咄嗟立辦其詞甚甘其權在彼利害之數未易計度 臣維銀行者商家之事商不信則力不合力不合則事不

成欲慎始而圖終必積小以成大擬請 開派大臣遴選各省公正股實之紳商舉為總董就召華商招  
集股本銀五百萬兩先在京都上海設立中國銀行其餘各省會各口岸以次添設分行照泰西商例悉  
由商董自行經理臣前在上海與開辦粵閩浙滬江漢各海關官銀號之紳商候選道嚴信厚議及銀行  
之事嚴信厚顧全大局情願以其獨開之銀號歸併公家之銀行使其氣局寬展并照匯豐銀行規以精  
紙用機器印造銀票與現銀相輔而行按存銀之數為印票之數以備隨時兌現現各省官司向銀行借貸  
應照西例由總行稟明戶部批准以何款抵還方能議訂合同歐洲國債數千百萬皆由銀行籌辦印發  
借券應收年息隨行取付大信不逾集事自易嗣後京外撥解之款可交匯以省解費公中備用之款可  
暫存以取子息官造銀元尙不能通行盡利者可由銀行轉輸上下官得坐收平色之利銀行用人辦事  
悉以匯豐章程為準則合天下之商力以辦天下之銀行但使華行多獲一分之利即從洋行收回一分  
之權並照西例俟有餘利酌量提捐歸公預定章程遵守商民既交得其便國家即除受其益俟將來官  
商交爭內外政法變通盡利再行籌設國家銀行與商行並行不悖庶幾早見措施以免空言無補 上  
諭盛宣懷條陳自強大計暨設立遠成館並開設銀行各摺片著軍機大臣總理各國事務衙門戶部妥  
議具奏○己未諭左庶子濟激請飭各省認真宣講 聖諭一摺各直省宣講 聖諭廣訓迭經飭諭敬



謹遵行誠恐日久生懈視爲具文著各省督撫學政率屬認真宣諭用示化民成俗至意○庚申許景澄奏奏使再屆期滿請飭派新任出使俄德奧和等國大臣接辦得 旨該衙門知道○許景澄奏

命兼駐俄德近因中俄交涉日繁不能不駐俄館以期辦理迅速而德國自助釁歸遼以來其君臣銳意謀拓東方商務於邦交亦關緊要往往兩國同有商務要件即苦不能兼顧德外部亦以使臣不常在德僅由參贊接洽噫憤不愜上年八月間彼國駐使曾向總理衙門述有政府要話不願由俄都轉電之說現法國業經改派專使法德並號大國相形之際該外部更可藉口而德尚有慮者向來俄人在華通商常居各國之後今自俄戶部大臣威特用事薦聽借款創設銀號近有議接鐵路之事時與俄臣接洽其所經營皆陰奪德人之利權中德君臣之所忌若以一使臣往來兼駐涉洽於俄必至見猜於德以後辦理德國交涉恐不惟不能聯絡適足以啟齟齬似宜藉目前照章更換使臣之使增遣大臣兼辦庶操縱之權出自中國而於兩國使務均有裨益得 旨該衙門知道○是月義大利國使臣巴爾迪回國參贊威遠衛署理○日本國使臣林董回國參贊內田康哉署理